


ବିସ୍ମୟୀ

বিস্মরণী

শ্রীমোহিতলাল মজুমদার

প্রণীত



জেনারেল প্রিন্টার্স অ্যান্ড পাবলিশার্স লিমিটেড

১১৯, ধর্মতলা স্ট্রীট, কলিকাতা

১৩৫৩

প্রকাশক : শ্রীসুদর্শনচন্দ্র দাস, এম-এ
জেনারেল প্রিন্টার্স স্যান্ড পাব্লিশার্স লিঃ
১১৯, ধর্মতলা স্ট্রীট, কলিকাতা

তৃতীয় সংস্করণ

আষাঢ়, ১৩৫৩

মূল্য চার টাকা

জেনারেল প্রিন্টার্স স্যান্ড পাব্লিশার্স লিমিটেডের
মুদ্রণ বিভাগে [অবিনাশ প্রেস—১১৯, ধর্মতলা স্ট্রীট,
কলিকাতা] শ্রীসুদর্শনচন্দ্র দাস, এম-এ, কর্তৃক মুদ্রিত

ଶ୍ରୀଯୁକ୍ତ କରୁଣାନିଧାନ ବନ୍ଦ୍ୟୋପାଧ୍ୟାୟ
କବିବରେଷୁ

একে একে খুলিয়াছি জীবনের গ্রন্থি পর-পর,
মেলে নি মনের মণি, বর্ষ পরে বর্ষ যায় ফিরে’—
শাশ্বতীর রক্ত-ভূষা রহে না যে রিক্ত তরুণিরে,
হারায় হেনার গন্ধ, ক্ষণে টুটে কদম্ব-কেশর !
নরত্ব হ্রস্ব জ্ঞানি, সুহ্রস্ব কবি-কলেবর—
সত্য সে কি ? মনে হয়, এই মরু-সৈকত-সমীরে,
পাই যদি প্রীতি-মুক্তা অবগাহি’ লবণাসু-নীরে,
বাণীর উদাস-দৃষ্টি তার চেয়ে নহে মনোহর ।

চলেছিহু ক্রান্তপদে স্নানরের তীর্থ-অভিলাষে,
সমুখে পড়িল ছায়া,—বনপথে এ কোন্ পথিক
গান গেয়ে চলে আগে ? ছন্দে যেন ভূগ স্পন্দমান !
জিজ্ঞাসিহু, কোথা যাও ? প্রাণ শুধু প্রাণের আশ্বাসে
বাহুপাশে দিল ধরা—সে মাধুরী মর্ত্যের অধিক !
অদৃষ্ট বিমুখ নয়, যাত্রা শুভ, আমি পুণ্যবান ।

মাঠের বাড়ী, কাঁচড়াপাড়া

ত্রিপঞ্চমী, ২৩ মাঘ, ১৩৩৩

‘বিস্ময়ণী’র তৃতীয় সংস্করণ মুদ্রিত হইল। দ্বিতীয় সংস্করণের ভূমিকায় বাহা লিখিয়াছিলাম তাহা যে সত্য নহে, ইহার প্রমাণ পাইয়া আমি কিঞ্চিৎ আশ্বস্ত হইয়াছি। শ্রীমান্ সুরেশ আমাব কাব্যগুলি পুনরুৎসাহ করিয়া, এবং তাহাদের বহিরঙ্গের যথাসাধ্য প্রসাধন করিয়া, এই যে প্রচার-ব্রত গ্রহণ করিয়াছেন, ইহার জন্য তিনিই কাব্যমোদী পাঠক-পাঠিকার ধন্যবাদভাজন। বহুকাল পরে গতবৎসর ‘বিস্ময়ণী’র দ্বিতীয় সংস্করণ প্রকাশিত হয়, এবং অল্পকালেই উহা নিঃশেষ হইয়া যায়। আমার কবিতার যে একরূপ বাজার-মূল্য আছে, তাহা আমি জানিতাম না—প্রকাশকই তাহা প্রমাণ করিলেন। কবিই বুদ্ধ ও পুরাতন হয়, কবিতা হয় না—ইহা সত্য; তথাপি আজিকার শট্‌স্কাট্‌-পরিধানা নবীনা কাব্যবধূদের আসরে, আমার এই ‘শ্রোণীভারাদলসগমনা’, অতিদীর্ঘ-চেলঞ্চলা, ও সালঙ্কারা, পৌরাণিক কবিতা-সুন্দরীকে কেহ যে অনুরাগের চক্ষে দেখিবে, এমন আশা করি নাই। এখন বুঝিতেছি, ভুল আমারই। কতক আমার নিজেরই কৰ্ম্মবুদ্ধির অভাবে, কতক বা প্রকাশ-কার্যের দোষে, আমার অগ্রাণ্ড কাব্যগুলি দপ্তরী-নামক ‘ফর্মা’-রক্ষীর শুদ্ধান্তঃপুরে অন্তর্যাম্পশ্চা হইয়া আছে; একখানির অবস্থা এমনই যে, উপযুক্ত প্রচ্ছাদনের অভাবে তিনি দোকানে পৌছিয়াও ক্রেতার মুখ দৃষ্টি আকর্ষণ করিতে পারেন না; অধিকন্তু তাহার সেই মূর্তিরও মূল্যবৃদ্ধি করা হইয়াছে! একে কবিতা, তাহার উপর সে-কবিতা এমন পৌরাণিক,—তাহাতেও নিশ্চিন্ত না হইয়া যদি কোন শুভানুধ্যায়ী প্রকাশক—বিজ্ঞাপন দেওয়া ত’ দূরের কথা—তাহাকে এমন হতশ্রী করিয়া রাখেন, তাহা হইলে ঐ বইখানির সম্বন্ধে তাঁহার এই মহাজনোচিত বৈরাগ্য অতিশয় আধ্যাত্মিক হইলেও, বাংলাদেশের পাঠক-পাঠিকার নিকটে গ্রহণকরই দায়ী। ‘বিস্ময়ণী’র দ্বিতীয় সংস্করণের আদর দেখিয়া আমার মনে হইয়াছে, বাঙালীর কাব্যরস-প্ৰীতির বরং আধিক্য-দোষ আছে, বিপরীতটি সত্য নহে।

গতবারে (দ্বিতীয় সংস্করণে) নানা কারণে কবিতাগুলির মুদ্রণ-সৌষ্ঠব আশানুরূপ হয় নাই, এবার, যতদূর সম্ভব সেই ত্রুটি সংশোধন করা গিয়াছে। প্রকাশকের নির্বন্ধাতিশয্যে কবির একখানি চিত্রও তাহার ললাটে যুক্ত হইয়াছে ; শুধু তাহাই নয়, প্রত্যেক বহিখানি কবির 'স্বাক্ষর-নামাঙ্কিত' করা হইয়াছে। এইরূপ একটা ফ্যাশন আছে, জানি—আমি কোন ফ্যাশনের পক্ষপাতী নই। কিন্তু বেহেতু গ্রন্থকার অপেক্ষা প্রকাশকই পাঠক-পাঠিকার রুচির সংবাদ অধিক রাখেন, অতএব প্রকাশকের ছকুম মানিতেই হইল—এতদিন পরে এই বয়সে বে-আক্রে হইলাম !

বাগনান (হাবড়া) ; বি, এন, আর, }
আষাঢ়, ১৩৫৩।

শ্রীমোহিতলাল মজুমদার

সূচী

কবিতা			পত্রাঙ্ক
মানস-লক্ষ্মী	১
ব্যথার আরতি	৪
স্পর্শ-রসিক	৬
মোহমুদগর	৯
পাণ্ডু	১৪
কালাপাতাড়	২৬
শব-সঙ্গীত	৩১
তুইন্বার্নের অম্লসরণে	৩২
অকাল-সন্ধ্যা	৩৪
দীপ-শিখা	৩৯
অগ্নি বৈশ্বানর	৪২
নূরজহান ও জহাঙ্গীর	৪৭
মাধবী	৬০
কন্যা-শবৎ	৬৩
শিউলির বিয়ে	৬৫
বাদল-রাতের গান	৬৯
বাঁধন	৭৩
পথিক	৭৬
মৃত-প্রিয়া	৭৮
মৃত্যু-শোক	৮৪

কবিতা			পত্রাঙ্ক
স্বপ্নের ডাক ৯১
সত্যেন্দ্র বিয়োগে ৯৬
নব তীর্থঙ্কর ৯৯
মৃত্যু ও নচিকেতা ১০৩
বিস্ময়রণী ১২৫



বিস্মরণী

মানস-লক্ষ্মী ।

আমার মনের গহন বনে
পা' টিপে বেড়ায় কোন্ উদাসিনী
নারী-অপ্সরী সঙ্গোপনে !
ফুলেরি ছায়ায় বসে তার দুই চরণ মেলি',
বিজন-নিভূতে মাথা হ'তে দেয় ঘোমটা ফেলি',
শুধু একবার হেসে চায় কভু
নয়ন-কোণে,
আমারি মনের গহন বনে !

বি শ্র র গী

সেথা স্মৃথ নাই, দুখ নাই সেথা,

—দিবা কি নিশা,

অস্ত-চাঁদের পাণ্ডু কিরণ

দেখায় দিশা ।

নিশ্বাসে যদি একবার তার বুকটি দোলে,

কত ফুল-কলি অমনি মাটিতে মুখটি তোলে,

ভুলে'-যাওয়া কোন্ ব্যথার সলিলে

মিটায় তৃষা,

সেথা স্মৃথ নাই, দুখ নাই সেথা,

—দিবা কি নিশা !

কত বিরহের বেদনা-তিমির

ঘনায় চুলে,

কত মিলনের রাঙা-উৎসব

অধর-কূলে

তবু তার সেই আঁখি-পল্লব শিশির-হারা,

উদাস গভীর চাহনিত্তে ভরা নয়ন-তারা !

কবে যে কেঁদেছে, হেসেছে কখন,—

গিয়েছে ভুলে',

কত যামিনীর জমাট আঁধার

জড়ায় চুলে !

ছিল কি একদা এই ভুবনেই

জীবন-সাথী ?—

বি স্ম র গী

কত জনমের—কত মরণের

দিবস-রাতি !

কতবার তার ভস্ম ভাসায়ে দিয়েছি জলে,

কভু সে আমারি চিতায় বসেছে চরণ-তলে,—

অজানা-ঔধারে যতনে জ্বালায়ে

বাসর-বাতি !

ছিল কি একদা এই ভুবনেই

জীবন-সাথী ?

আর কি কখনো এই বাহুপাশে

দিবে না ধরা ?

হৃদয়-সায়রে হ'য়ে গেছে তার

কলস-ভরা ?

এ আলোকে যবে না হেরি' তাহারে, পরাণ কাঁদে—

মনো-বাতায়নে গোধূলি-বেলায় বেগী সে বাঁধে ।

গানেরি আড়ালে সাড়া দেয় শুধু

সে অঙ্গুরা,

বাহির-ভুবনে এই বাহুপাশে

দিবে না ধরা ।

ব্যথার আরতি

যত ব্যথা পাই—তত গান গাই, গাঁথি যে সুরের মালা,
ওগো সুন্দর ! নয়নে আমার নীল কাজলের জ্বালা !
এই অবনীর বেদনা-নিবিড় সবুজ অন্ধকারে
পথ ভুলি বারে-বারে,
কণ্টকে ফোটে রক্ত-কুসুম বাসনা-সুরভি-ঢালা !

যত দিন যায়, ঔঁথি না জুড়ায়—অশ্রুর পারাবার
পূর্ণ-প্রাণের পূর্ণিমা-রাতে উথলিছে অনিবার !
ওই গগনের নিশীথ-নীরব নীলিমার কূলে-কূলে
দীপ উঠে ছলে' ছলে'—
তারি পানে চেয়ে সোনা মনে হয় মৃন্ময় সংসার !

যত সে কাঁদায় তত বুকে বাঁধি, তত তারে ভালোবাসি—
ধরণীর এই শ্রাম মুখখানি, ঔঁধার অলক রাশি ।
ভয়ের স্বপন এত দেখি, তবু চাহি না ত, নিশি ভোর,
ভাঙ্গে না যে স্রুম-ঘোর !
চুলে' পড়ি যবে বিষ-হাসি হাসে রূপসী সর্বনাশী !

বি ন্ন র গী

জীবনের নিশা জ্যোৎস্নায় ভরে মৃত্যুর স্নান রাতে—
মরম-মুরজ মুরছিয়া বাজে নির্মম করাঘাতে !
হারাই যাহারে তারি তরে হিয়া আরো করে হায়-হায়—
স্মৃতি-সুখ উথলায় !
মরণের ডালা সাজাইয়া ধরি অমরণ ফুলপাতে !

হাহা করে হাওয়া, দীপ নিবে যায়, সাথীহীন অমরাতি,
বাহিরে বিজনে হান্সু হানায় জ্বলিছে জোনাকি-পাঁতি ।
সে মহাশূন্য ভরি' ওঠে মোর নিরাশার উল্লাসে,
—কেঁদে উঠি কলহাসে !
আঁধার নয়নে চমকিয়া ওঠে মেরু-দামিনীর ভাতি ।

যত ব্যথা পাই, তত গান গাই—গাঁথি যে সুরের মালা !
ওগো সুন্দর ! নয়নে আমার নীল-কাজলের জ্বালা !
আঁখি অনিমিত্ত, মুটে না পিপাসা, এ দেহ দহিতে চাই !
সুখ দুখ ভুলে যাই !—
বুঝিয়াছি কেন কুলে কালি দেয় তোমা' লাগি' কুলবালা ।

স্পর্শ-রসিক

আমারে করেছে অন্ধ গন্ধ-ধূমে দেহ-ধূপাধার,
মাদক সৌরভে তার চেতনা হারায় !
বিষ-রস পান করি' স্বাদ পাই স্বরগ-সুধার,
চির-বন্দী আছি তাই স্বপ্ন-কারায় !
অন্ধ আমি, দেহ তাই স্পর্শে হাহা করে,
ধরার ধূলায় তাই ফুল-রেণু বারে !
আলো—সে যে উষ্ম শুধু, জানি কত শীতল আঁধার—
সর্ব্ব-অঙ্গ স্নান করে চুম্বন-ধারায় !

অন্ধ আমি, দিশে দিশে গন্ধ তাই করে দিশাহারা,
চিরদিন মধু করে মধুর বঞ্চনা !
করাঙ্গুলি ক্ষত হয়—হেরি না যে কাঁটার পাহারা,
দৃষ্টিহীনে করে সবে বৃথাই গঞ্জন !

বি স্ম র গী

সে বেদনা কণ্ঠে মোর গীত হ'য়ে ঝাজে,
ব্যথায় বৃহৎ হ'য়ে সে ফুল বিরাজে !
অশ্রুজলে আর্দ্র হয় জীবনের এ মরু-সাহারা—
প্রাণের পিরীতি মোর হয় নিরঞ্জন।

অন্ধ আমি—জাগি তাই সারারাত পরশ-পিয়াসে,
শয়ন-শিয়রে মোর জ্বলে না প্রদীপ,
হেরি নাই মুখ তার, বুক শুধু বাঁধি বাহুপাশে,
অঙ্গে অঙ্গে শিহরিয়া ফোটে লক্ষ নীপ !
মিলন-রজনী মোর আঁধার শ্রাবণ—
ছুই দেহ-তটে সে কি দুরন্ত প্লাবন !
অন্ধ হয় অন্ধকার !—অন্ধ আঁখি বিদ্যুৎ বিকাশে !
সে মুহূর্তে আমি যে গো মরণ-অধিপ !

স্নায়ুশিরা-শততন্ত্রী ঝঙ্কারিছে প্রাণের হরষে,
দীপহীন চিন্তে মোর দীপক-উল্লাস !
মিটাতে চাহি না তৃষা নিস্তরঙ্গ অমৃত-সরসে,
চাই মৃত্যু, চাই নব-জনম-আশ্বাস !
দৃষ্টিপথে সৃষ্টি আরো হয় যে সূদূর !
—দেহ করে আলিঙ্গন, তবে সে মধুর !
আঁখি তাই মুদে আসে—তৃপ্ত যবে প্রিয়ের পরশে,
—মিলে যবে বাহুপাশে নিশ্বাসে নিশ্বাস !

বি স্ম র গাঁ

দেহী আমি, মন্দিরে মন্দিরে তাই পরশ-ভিখারী,
দেবতারে স্পর্শ করি' করি যে প্রণাম !
ধরণীর স্পর্শ-মণি—মর্মে আছে পরশ তাহারি,
সে পরশে জড়ে-চিতে ভুলেছে সংগ্রাম ।
পরশ-রসিক আমি, অন্ধ আঁখি-তারি,
আমার আকাশ তাই শশীসূর্য্য-হারি !
পদতলে পৃথ্বী আছে আলিঙ্গন চৌদিকে বিধারি,—
আলো নাই, আছে শুধু প্রাণের আরাম ।

মোহমুদার

দেহে তোব প্রাণ আছে ? তবে কেন ওরে ভীক নিত্য-উপবাসী-

চিবমৃত্যু-মোক্ষ-অভিলাষী ?

বন্ধ অশ্রু, শুষ্ক চোখ, ভস্মশেষ জঠরাগ্নিজ্বালা—

তাহারি বিভূতি মাখি', দেহে পবি' কণ্টকাস্থিমালা,

হৃদপিণ্ডে জ্বলাইয়া হোম-হুতাশন,

মমতা-আহুতি তায় করিয়া অর্পণ,—

প্রাণ তবু হাহা করে কাব লাগি', হে কঠোর তাপস উদাসী ?

—চির-উপবাসী !

রজনী তিমির-ঘোরা, কুহু-অমানিশি যাপি' গ্রহরে গ্রহরে,

মন্ত্র জপি' শবাসন 'পরে,—

ভরিয়া কপাল-পাত্রে অবিরল অনল তরল,

অটুহাস্যে নিবারিয়া মমতার গলদশ্রজল,

বি স্ম র গী

প্রায়সী-নারীর মুখে হেরি' বিভীষিকা,
আপনারি বক্ষ-রক্তে পরি' জয়-টীকা,
কি লভিলে, ওহে বীর, বামমার্গী কাপালিক, নাস্তিক তান্ত্রিক ?
—ধিক্ তোমা ধিক্ !

উর্দ্ধমুখে ধেয়াইয়া রজোহীন রজনীর মল্লিকা-মাধবী,
নেহারিয়া নীহারিকা-ছবি,—
কল্পনার দ্রাক্ষাবনে মধু চুষি' নীরক্ত অর্ধরে,
উপহাসি' দুষ্কধারা ধরিত্রীর পূর্ণ পয়োধরে,
বুভুক্ষু মানব লাগি' রচি' ইন্দ্রজাল,
আপনা বঞ্চিত করি' চির ইহকাল,
কতদিন ভুলাইবে মর্ত্যজনে বিলাইয়া মোহন আসব,
হে কবি-বাসব ?

জন্ম যদি হ'য়ে থাকে অন্ধকার শূন্য হ'তে লভি' এই কায়া,
ব্যর্থ কর অদৃষ্টের মায়া !
নামহীন ধামহীন পরিচয় বহিয়া পশ্চাতে,
সন্মুখে সে বিসর্জন অন্তহীন তমিস্রার রাতে,—
দগু দুই দেহ ধরি' পূর্ণ অবতার,
সুখ-দুঃখ পুণ্য-পাপে মহা অধিকার !
—তৃপ্তি নাই তবু তাহে ? হা অভাগ্য আত্মঘাতী কাল-ক্রীড়নক
—মূর্থ মানবক !

বি স্ম র গী

এক মাত্র সত্য এ যে!—ধরণীর এই দ্বীপ মিথ্যা-পারাবারে—

মুক্তি-তীর্থ মৃত্যু-কারাগারে!

আলোকে পড়িল ছায়া, কত কল্প নিরাকার থাকি'!—

অনঙ্গ লভিল অঙ্গ, এড়াইয়া সংহারের জাঁখি!

দেহ-দ্রুমে বিকশিল মনোজ-মন্দার!

শুভ্রিগর্ভে সুচূর্ণিত মুকুতা-সঞ্চার!—

অবহেলি' তবু তায়, শূন্যে বাহু প্রসারিয়া নিত্য হাহাকার!

—একি মিথ্যাচার!

আকাশের ছত্র-পটে সোমসূর্য্যতারকার গ্রন্থি-দীপমালা

চিরদিন এমনি উজালা!

ধরণীর চেলাঞ্চল যুগান্তেও এমনি নবীন!

অক্ষয়যৌবনা শ্যামা নৃত্যচক্রে যতিভঙ্গহীন!

বিষ্ণুনাভি-পদ্মশায়ী অম্বটা-প্রজাপতি,

তারি আলিঙ্গনে বাঁধা বধূটী যুবতী!—

সেই হ'ল ক্ষণচ্ছায়া! তাহারি সে মাতৃ-অঙ্ক—প্রত্যক্ষ ভুবন...

অলৌক স্বপন!

কোটা-জীব-কল্লোলিত—দাঁড়াইয়া, এ জীবন-বারিধি-বেলায়,

মোর চক্ষে অশ্রু উথলায়!

এই চিরহৃন্দরের রূপ-হর্ম্যে ফিরিব আবার?

কক্ষে-কক্ষে সবিস্ময়ে খুলিব কি ইন্দ্রিয়-দুয়ার?

বি স্ম র গী

নিরালম্ব বায়ুভূত ছায়ার শরীর
তাজ্জিবে কি পুনরায় অনাদি তিমির ?---
হৃদয়-বাঁশরীখানি বাজাব কি এই দেহ-পঞ্চবটী তলে,
তিতি' অশ্রুজলে ?

কারে চেয়ে ঠেলে দাও এ প্রসাদ-পরমান্ন, রে চিরভিখারী ?
—আনন্দের ক্ষণ-অধিকারী !
মহাশূন্যে ফিরে' যেতে একি তোর প্রাণান্ত প্রয়াস !
সে যে তোর নিত্যসত্তা—সে যে তোর অস্তিত্ব আবাস !
চির অভিষাপ সেই অন্তহীন আয়ু !
জীবন—সৌভাগ্য তোর, নাম পরমায়ু !—
আনন্দ-বিহ্বল বিধি একবার নির্বিবচারে করিয়াছে দান,
ওরে ভাগ্যবান !

এস কবি, এস বীর, নির্মম সাধক এস, এস হে সন্ন্যাসী !
ছিঁড়ে ফেল অদৃষ্টের ফাঁসী ।
দেহ ভরি' কর পান কবোক্ষ এ প্রাণের মদিরা,
ধূলা মাখি' খুঁড়ি' লও কামনার কাচমণি-হীরা ।
অন্ন খুঁটি' লব মোরা কাঙালের মত,
ধরণীর স্তনযুগ করি' দিব ক্ষত
নিঃশেষ শোষণে, ক্ষুধাতুর দশন-আঘাতে করিব জর্জর—
আমরা বর্বর ।

বি স্ম র গী

এ ধরার মর্মে বিঁধে রেখে যাব স্নেহ-ব্যথা, সন্তান-পিপাসা,

তাই র'বে ফিরিবার আশা ।

দুধের বাটিটি তুলে রেখে দিবে সে যে মোর লাগি'—

মৃতবৎসা জননীর বেদনা যে নিত্য রহে জাগি' !

ক্রোড়ে তার বারবার আহ্বান-আকুল—

ঝরিবেই পরলোক-নিশীথের ফুল,

তারি তরে, ওরে মূঢ় ! জ্বলে নে রে দেহ-দীপে স্নেহ-ভালোবাসা

—নবজন্ম-আশা !

পান্থ

(দার্শনিক সন্ন্যাসী Schopenhauer-এর উদ্দেশে)

১

জগতের বহির্দ্বারে পরিশ্রান্ত কে তুমি পথিক ?—
চলে না চরণযুগ, দাঁড়াইলে তোরণেব তলে ;
যেতে মন নাহি সরে,—জীবন যে মরণ-অধিক !
মিটে না পিপাসা আর ধরণীর তিক্ত হলাহলে !
নেহারিলে উর্দ্ধাকাশে জ্যোতিষ্কের জ্যোতি অনিমিত্ত,
শশিহীন অন্ধকারে !—অনির্বচ্য শীতল অনলে
জুড়াল না তপ্তভাল,—সুপ্তি নাই !—বিশ্ব বাঁধা স্বপন-শৃঙ্খলে !

২

যুগ-যুগান্তর ভ্রমি' ক্লিষ্ট জানু, দেহ পরিক্ষীণ—
সংসারের পুরী-প্রান্তে নামাইলে বাসনার ভার ;

বি স্ম র ণী

লালসার স্থলপদ্ম মুঠিতলে বিবর্ণ মলিন,
রূপের রক্তরাশি মনে হয় মৃত্তিকা অসার !
হাসি যে রঙ্গিন ধূলা !—অশ্রু নয় অভ্র সে কঠিন !
কীর্তির কিরীট-মণি জঞ্জাল যে পথ-পরিষ্কার !—
প্রাণ তবু জ্বলে হের ধিকি-ধিকি,—ভস্মস্বপ্নে যেন সে অঙ্গার !

৩

জীবনের অগ্নিহোত্রে জাগিয়াছে তাই নিরন্তর
চিরমৃত্যু-নির্ব্বাণ-পিপাসা ! বেদনার বেদগান
গভীর উদাত্ত সুরে ভরিয়াছে ও চিত্ত-কুহর—
জন্মান্তর-জলধির অতিদূর কল্লোল সমান !
মৃত্যুর নেপথ্যে শুধু পুনর্ভব !—ভাবনা হুর্ভর !
লোকে-লোকে কল্লে-কল্লে কামনার দৃপ্ত অভিযান !
জন্ম-জরা-মৃত্যু-ভরা অবনীর নবনীতে এ কি বিষপান !

৪

হানিল ত্রিশূল বুকে মহাকাল ?—স্বপ্নভঙ্গে তুমি
শিহরি' উঠিলে হেরি' দীর্ঘ-রেখা মর্ম্মরে মর্ম্মরে ?
বেদনার চেতনায় স্তব্ধ হ'ল সারা চিত্তভূমি,
সোমসূর্য্য-রথচক্র—নেমিহারা—অনন্ত অম্বরে,
জাগাইল মহাত্মা !—সিন্ধুশেষে দিগন্তর চুমি'
অস্ত গেল বর্ণচ্ছটা ! অন্তহীন তুহিন-নির্ঝরে
ঢাকা প'ল ধরণীর শ্যামশোভা—বিধবা সে যৌবন সম্বরে !

বি স্ম র গী

৫

মানসের সরোবরে কলহংস ত্যজিল মৃণাল,
হেমপদ্ম মরে' গেল—সপ্তস্বষি নিত্য ফিরে যায় !
ভাসে না সলিলে আর অপসরার মুক্ত কেশজাল,
পুষ্পহীন ধনু-তুণ,—মনসিজ সভয়ে লুকায় !
সন্ধ্যা আসে স্নানমুখ, নিশীথিনী গস্তীর ভয়াল !—
দিবসের পরিশেষে তন্দ্রা আছে—নিদ্রা নাহি তায় !
আছে ঘোর দুঃস্বপন—সাথী নাই, নয়নের লোর যে মুছায় !

৬

সেই স্বপ্ন ভাঙ্গিবারে কি সাধনা তব, স্বপ্নহর !
কামনারে পাপ বলি, বিরচিলে তারি বিভীষিকা—
জীবন-দর্পণে তার নেহারিয়া মূর্তি ভাস্বর,
আর্দ্র-কণ্ঠে ফুকারিলে—‘নিখিলের এ মনোহারিকা
শূলহস্তা নৃমুণ্ডমালিনী !—তার প্রহারে জর্জর
কাঁদিতেছে সপ্তলোক ! ভ্রাস্ত পান্থ হেরি' মরীচিকা
ঘুরিতেছে দেহে-দেহে, ভালে পরি' নিত্য নব মরণের টীকা !’

৭

রুধিয়া রুধির-ধর্ম্ম, হইবারে প্রাণহীন শিলা
করেছিলে জ্ঞানযোগ, এবারের দৌর্য পথ বাসে ;
নেহারিলে ক্ষুদ্রমনে জীব-যজ্ঞে প্রকৃতির লীলা,
একাকী জাগিলে, যোগী ! জগতের নিদ্রা-অবকাশে !

১৬

বি স্ম র গী

স্বপ্ন দেখে চরাচর, শুধু তব দৃষ্টি অনাবিলা
সারারাত্রি নির্গিমেঘ !—নিরখিলে ব্যথারুদ্ধ-শ্বাসে,
সহঃপাতি জীবনের বেপথু সে, মরণের উদধি-উচ্ছ্বাসে !

৮

নভ নীল বেদনায় ! গূঢ়রক্ত হরিত-শ্যামল !
ধূসর উদাস কভু পৃথিবীর পঞ্জর-পাষণ !
স্থলে জলে অস্তুরীক্ষে আত্মরক্ষা করে জীবদল
নিয়ত সংগ্রামশীল, বাজিতেছে কালের বিষাগ !
দণ্ডে ফুটি' দণ্ডে লয়—জীবাণুরা মরণ-পাগল !—
সহস্র মৃত্যুর 'পরে জীবনের উড়িছে নিশান,
মৃত্যুর নাহিক শেষ, দুঃখময় জীবনের নাহি অবসান !

৯

ভাবনা-কুঞ্চিত ভাল, ব্যথাতুর পরিশ্রান্ত হিয়া,
ললাটের স্বেদ মুছি' নেহারিলে স্তিমিতলোচন,
মানবের জীব-যাত্রা,—হেরিছে সে স্বপ্ন মোহনিয়া,
মৃত্যুর অমৃতরূপ !—কামমুগ্ধ পশু অগণন !
স্মরি' হতভাগ্য নরে শুক আঁখি উঠে সরসিয়া—
আত্মঘাতী প্রেম তার !—জানে না সে কিসের কারণ
নারীর অধরে হায় পান করে কালকূট, মানে না বারণ !

১৭

বি স্ম র গী

১০

গ্রহ-তারা যে নিয়মে চিরদিন ভ্রমিছে আকাশ,
তারি বশে যৌবনের স্বেচ্ছা-বলি পরিণয়-যুগে—
বিধির কোতুক একি ! নিয়তির ক্রুর পরিহাস !
জীব-চক্র ঘুরাবারে মজে নর রমণীর রূপে !
তারি লাগি' হাশ্মুখ ! নেত্রে তাই বিদ্যুৎ-বিভাস !
তবু হের, চায় চোর প্রেয়সীর চোখে চুপে চুপে !—
জ্ঞানে মনে, আরো কত ভাগ্যহীনে মজাইবে জন্মজরা-কূপে !

১

তাই তুমি পলাতক—রমণীরে করনি প্রণতি,
প্রকৃতির লাস্ত্রলীলা হেরিয়াছ শাস্ত্র কুতূহলে,
প্রেমের দিয়েছ নাম—জীবধর্ম, দেহের নিয়তি,
মোহের মঞ্জরী-ঝরা বিষ-বীজ ধরার অঞ্চলে !
হে সন্ন্যাসী, বাণী তব—বেদনার অপূর্ব দুরতি—
মূর্খি' পড়িছে নিত্য অনুরক্ত মোর চিত্ততলে,
কেমন আত্মীয় তুমি বুঝি না যে, তবু ভাসি নয়নাশ্রুজলে !

১২

যে স্বপ্ন হরণ তুমি করিবারে চাও, স্বপ্নহর !
তারি মায়া-মুগ্ধ আমি, দেহে মোর আকণ্ঠ পিপাসা !

১৮

বি স্ম র গী

মৃত্যুর মোহন-মস্ত্রে জীবনের প্রতিটি প্রহর
জপিছে আমার কানে স করুণ মিনতির ভাষা !
নিষ্ফল কামনা মোরে করিয়াছে কল্ল-নিশাচর !
চক্ষু বুজি' অদৃষ্টের সাথে আমি খেলিতেছি পাশা—
হেরে যাই বার বার, প্রাণে মোর জাগে তবু হুরন্ত হুরাশা !

১৩

সুন্দরী সে প্রকৃতির জানি আমি —মিথ্যা-সনাতনী !
সত্যেরে চাহি না তবু, সুন্দরের করি আরাধনা—
কটাক্ষ-ঈক্ষণ তার—হৃদয়ের বিশল্যকরণী !
স্বপনের মগিহারে হেরি তার সীমন্ত-রচনা !
নিপুণা নটিনী নাচে, অঙ্গে-অঙ্গে অপূর্ব লাবণি !
স্বর্ণপাত্রে সুধারস, না সে বিষ ?—কে করে শোচনা !
পান করি স্তম্ভিত, মুচকিয়া হাসে যবে ললিত-লোচনা !

১৪

জানিতে চাহি না আমি কামনার শেষ কোথা আছে,
ব্যথায় বিবশ, তবু হোম করি জ্বলি' কামানল !—
এ দেহ ইক্ষন তায়—সেই স্তম্ভ !—নেত্রে মোর নাচে
উলঙ্গিনী ছিন্নমস্তা !—পাত্রে ঢালি লোহিত গরল !
মৃত্যু ভূতরূপে আসি' ভয়ে ভয়ে পরসাদ যাচে !

১৯

বি স্ম র গী

মুহূর্তের মধু লুটি—ছিন্ন করি' হৃদপদ্ম-দল !
যামিনীর ডাকিনীরা তাই হেরি' এক সাথে হাসে খল-খল !

১৫

চিনি বটে যৌবনের পুরোহিত প্রেম-দেবতারে,—
নারীরূপা প্রকৃতিরে ভালোবেসে বক্ষে লই টানি',
অনন্তরহস্তময়ী স্বপ্ন-সখী চির-অচেনারে
মনে হয় চিনি যেন—এ বিশ্বের সেই ঠাকুরাণী !
নেত্র তার মৃত্যু-নীল !—অধরের হাসির বিথারে
বিস্মরণী রশ্মিরাগ ! কটিতলে জন্ম-রাজধানী !
উরসের অগ্নিগিরি সৃষ্টির উত্তাপ-উৎস !—জানি তাহা জানি ।

১৬

এ ভব-ভবনে আমি অতিথি যে তাহারি উৎসবে !—
জন্ম-মৃত্যু—ছুই দ্বারে দাঁড়াইয়া সে করে বন্দনা !
অশ্রুজলে স্নানোদক ঢালি' দেয় স্নেহের সৌরভে,
মুক্ত করি' কেশপাশ, পাদপীঠ করে সে মার্জনা !
নিঙাড়িয়া মর্শ্ব-মধু ওঠে ধরে অতুল গৌরবে !
পরশে চন্দন-রস ! মালাখানি ছু'ভুজে রচনা !
আমারে তুষিবে বলি' প্রিয়া মোর ধূলি 'পরে দেয় আলিপনা !

২০

বি স্ম র ণী

১৭

তবু সে মোহিনী ! আহা, তাই বটে !—হে জ্ঞানী বৈরাগী,
এ জ্ঞান কোথায় পেলো ?—মর্শ্বে-মর্শ্বে তুমি মহাকবি !
রুদ্ধপ্রাণে কুপিতা সে প্রকৃতির অভিশাপভাগী—
কল্পনার নিশিযোগে আধারিলে মনের অটবী !
অভ্রভেদী চিত্ত-চূড়া মৃত্তিকার পরশ তেয়াগি’
উঠিয়াছে মেঘলোকে !—সেথা নাই নিশাস্তের রবি !—
বিদ্যৎ-গজ্জন-গানে নিত্য সেথা নৃত্য করে ভাবনা-ভৈরবী !

১৮

কহ মোরে, ভাতিস্মর ! কবে তুমি করেছিলে পান
ধরণীর মৃৎপাত্রে রমণীর হৃদয়ের রস ?
পূর্বজন্ম-বিভীষিকা ?—তারি ভার প্রেতের সমান
বক্ষে চাপি’ স্মৃতি-বিষে করিল কি বাসনা বিবশ ?
ব্যথার চাতুরী শুধু ?—মাধুরীতে ভরে নাই প্রাণ ?
মধু-রাতে মাধবীটি তুলে নিতে হ’ল না সাহস !
ওঠে হাসি, নেত্রে জল—বুঝিলে না অপরূপ জ্বালার হরষ !

১৯

জীবনের দুঃখ-সুখ বার-বার ভুঞ্জিতে বাসনা—
অমৃত করে না লুক্ক, মরণেরে বাসি আমি ভালো !

২১

বি স্ম র গী

যাতনার হাহারবে গাই-গান,—তৃষার্ত রসনা
বলে, ‘বন্ধু ! উগ্র ওই সোমরস ঢালো, আরো ঢালো !’
তাই আমি রমণীর জায়া-রূপ করি উপাসনা—
এই চোখে আর বার না নিবিতে গোধূলির আলো,
আমারি নূতন দেহে, ওগো সখি, জীবনের দীপখানি জ্বালো !

২০

আর যদি নাই ফিরি—এ ছয়ারে না দিই চরণ ?
অশ্রু আর হাসি মোর রেখে যাব তোমার ভবনে,
এই শোক এই সুখ নব-দেহে করিয়া বরণ,
মন সে অমর হবে বেদনার নূতন বপনে !
পয়োধর-সুধা দানে ক্ষুধা তার করি’ নিবারণ,
জীয়াইয়া তুলি’ তারে পিপাসার জীবন্ত যৌবনে,
আবার জ্বালায়ে দিও বিষম বাসনা-বহ্নি বৈশাখী-চুম্বনে !

২১

অস্ত্রহীন পশুচারী, দেহরথে করি আনাগোনা !—
জীবন-জাহ্নবী বহে নিরবধি শ্মশানের কূলে,
নিত্যকাল কুলু-কুলু কলধ্বনি যায় তাঁর শোনা,
কভু রৌদ্র, কভু জ্যোৎস্না, কভু ঢাকা তিমির-দুকূলে !
জ্বলে দীপ, দোলে ছায়া, উন্মিগুলি নাহি যায় গোণা,

২২

বি স্ম র গী

ভেসে যাই তটতলে—এই দেখি, এই যাই ভুলে !
সুক্রাতে তারকার পানে চেয়ে আঁখি মোর ঘুমে আসে ঢুলে !

২২

কোথা হ'তে আসি, কিবা কোথা যাই—কি কাজ স্মরণে ?
চলিয়াছি—এই সুখ !—সঙ্গে চলে ওই গ্রহতারা !
ভয়, পাছে থেমে যাই গতিহীন অবশ চরণে,
দিক্চক্র-অন্তরালে হয়ে যাই উদয়াস্ত-হারা !—
আমারে হারাই যদি !—যদি মরি সুচিব-মরণে !
ব্যথা আর নাহি পাই—শেষ হয় নয়নের ধারা !—
বল, বল, হে সন্ন্যাসী ! এ চেতনা চিরতরে হবে না ত' হারা ?

২৩

এ পিপাসা স্তমধুর—বল তুমি, বল, স্বপ্নহর !
ঘুচিবে না ?—মরণের শেষ নাই, বল আর বার !
তুমি ঋষি মন্ত্রদ্রষ্টা !—বলিয়াছ, এ দেহ অমর !—
সৃষ্টিমূলে আছে কাম, সেই কাম দুর্জয় দুর্বাব !
যুপবদ্ধ পশু আমি ?—ভরিতেছি মৃত্যুর খর্পর
তপ্ত শোণিতের ধারে ?—না, না, সে যে মধু'র উৎসার !
দুই হাতে শূন্য করি পূর্ণ সেই মধুচক্র প্রতি পূর্ণিমার !

২৩

বিপ্লব গী

২৪

তোমারে বেসেছি ভালো—কেন জানি, হে বীর মনীষী !
ব্যথায় বিমুখ তুমি, তবু তারে করেছ উদার !
করুণার সঙ্কাতারা !—মন্ত্রে তব স্তনীতল নিশি
তাপশেষে মিটাইয়া দেয় বাদ গরল-সুধার !
স্বপ্ন আরো গাঢ় হয়, সত্য সাথে মিথ্যা যায় মিশি',
মনে হয়, সোমাহীন পরিধি যে ক্ষুদ্র এ ক্ষুধার !—
পরম-আশ্বাসে প্রাণ পূর্ণ হয়, ধন্য মানি এ মর্শ্ব-বিদার !

২৫

কবির প্রলাপ শুনি' হাসিতেছ ?—তাপস কঠোর !—
স্বপ্নহর ! স্বপ্ন কিগো টুটিয়াছে ? ধূলির ধরায়
কামনা হয়েছে ধূলি ? আর কভু নয়নের লোর
বহিবে না !—এড়ায়েছ চিরতরে জন্ম ও জরায় ?
ওগো আত্ম-অভিমানী ! এত বড় বেদনার ডোর
বুনিয়াছে যেই জন, মুক্তি তার হবে কি ত্বরায় ?
দুঃখের পূজারী যেই, প্রাণের মমতা তার সহসা ফুরায় ?

২৬

নিঃসঙ্গ হিমাদ্রি-চূড়ে জলিয়াছে হর-কোপানল,
মদন হয়েছে ভস্ম, রতি কাঁদে গুমরি' গুমরি' !

২৪

বি স্ম র ণী

উমা সে গিয়েছে ফিরে, অশ্রু-চোখ স্নান ছল-ছল—
ফুলগুলি ফেলে গেছে ঈশানের আসন-উপরি ;
আঁখিতে আঁকিয়া গেছে অধরোষ্ঠ—পক্ব বিশ্বফল !
শ্মশানে পলায় যোগী তারি ভয়ে ধ্যান পরিহরি’—
বধূর দুকূলে তবু বাঘছাল বাঁধা প’ল—আহা, মরি মরি !

২৭

স গ্য শুধু কামনাই—মিথ্যা চির-মরণ-পিপাসা !—
দেহহীন, স্নেহহীন, অশ্রুহীন বৈকুণ্ঠ-স্বপন !
যমদ্বারে বৈতরণী, সেথা নাই অমৃতের আশা—
ফিরে ফিরে আসি তাই, ধরা করে নিত্য নিমন্ত্রণ !
এই জন্ম-মালিকার—মৃত্যু সূচী, ডোর ভালোবাসা—
প্রকৃতি যোগায় ফুল, নারী গাঁথে করিয়া চয়ন—
পুরুষ পরিয়া গলে, চেয়ে থাকে মুখে তার অতৃপ্ত-নয়ন !

২৮

তোমারে স্মরিবু আজ জীবনের সায়াহ্নবেলায়,
হে বিরাগী ! হিন্দু বলি’ পরিচয় দিলে বার-বার—
তুমি চিরমৃত্যু-লোভী ; মোর ভয়—দেহের ভেলায়
কবে ডুবি, পারাপার করিতে এ জন্ম-পারাবার !
জানি না হিন্দুর কথা,—জানি শুধু, প্রাণের খেলায়
দুঃখে ডরে না কেহ, দুঃখে তবু হাসিছে সংসার !
তুমিও বলেছ তাই !—হে উদাসী ! তাই তোমা করি নমস্কার ।

কালাপাহাড়

শুনিছ না—ওই দিকে দিকে কাঁদে রক্ত-পিশাচ প্রেতের দল !
শবভুক যত নিশাচর করে জগৎ জুড়িয়া কী কোলাহল !
দূর-মশালের তপ্ত-নিশাসে ঘামিয়া উঠিছে গগন-শিলা !
ধরণীর বুক থরথরি' কাঁপে—একি তাণ্ডব নৃত্য-লীলা !
এতদিন পরে উদিল কি আজ সুরাসুরজয়ী যুগাবতার ?—
মানুষের পাপ করিতে মোচন, দেবতারে হানি' ভীম প্রহার,
—কালাপাহাড় !

বংশ যাহার বলি যোগাইল যুগে, যুগে-যুগে, ভয়-বিভল—
জাগিয়াছে তারি বীর-সন্তান হুঙ্কারে ভরি' জলস্থল !
পথে পথে ওই গিরি নুয়ে যায়, কটাক্ষে রবি অন্তমান !
খড়গ তাহার থির-বিদ্যুৎ !—ধূলি-ধ্বজা তার মেঘ-সমান !
সেই আসে ওই !—বাজে ছন্দুভি, তামার দামামা, কাড়া-নাকাড় !
এতদিন পরে উদিল কি আজ সুরাসুরজয়ী যুগাবতার !
—কালাপাহাড় !

বি - স্ম - র - গী

পাষণ-পুরীর খিল খুলে' যায়, দূর হ'তে শুনি' হুহুকার !
পূজাবেদী-মূলে হেম-তৈজস বঙ্কার করে আশঙ্কার !
বেগে বাহিরায় লৌহ-কীলক বিরাট দেউল-কপাট-পাটে !
আঁধার-গহবরে জাগে হাহাকার, বিগ্রহ-শিলা আপনি ফাটে !
পূজারী-পাণ্ডা ঝাণ্ডা নামায়ে প্রাঙ্গণ-তলে খায় আছাড় !
ওই আসে—ওই, বাজায়ে দামামা, ভীম-নির্ঘোষ কাড়া নাকাড়,
—কালাপাহাড় !

অকাল-জলদ-উদয় যেন সে উদিয়াছে কাল !—কালাপাহাড় !
ডাকিনীরা ওই দলে দলে চলে, গলে দোলে নর-কপাল-হাড় !
রক্ত-শোষণ পাপ-বিভীষিকা, প্রাণ-শিহরণ মন্ত্র-গান,
আঁখি মুদি' ভয়ে জপ অনিবার, অন্ধ আরতি, প্রদীপ-দান—
ঘুচাইতে আসে মহাভয়হারী দেবারি-মানব যুগাবতার—
ঘুচাবে কায়ার ছায়া-শৃঙ্খল, চূর্ণ করিবে পাষণ-ভার !
—কালাপাহাড় !

কতকাল পরে আজ নর-দেহে শোণিতে ধ্বনিছে আগুন-গান !
এতদিন শুধু লাল হ'ল বেদী—আজ তার শিখা ধূমায়মান !
আদি হ'তে যত বেদনা জমেছে—বঞ্চনাহত ব্যর্থশ্বাস—
ওই উঠে তারি প্রলয়-ঝটিকা, ঘোর-গর্জন মহোচ্ছ্বাস !
ভয় পায় ভয় ! ভগবান ভাগে !—প্রেতপুরী বৃষ্টি হয় সাবাড় !
ওই আসে—তার বাজে হুন্দুভি, তামার দামামা, কাড়া-নাকাড় !
—কালাপাহাড় !

বি স্ম র গী

কোটা-অঁথি-ঝরা অশ্রু-নিঝর ঝরিল চরণ-পাষণ-মূলে,
ক্ষয় হ'ল শুধু শিলা-চব্বর—অন্ধের অঁথি গেল না খুলে !
জীবের চেতনা জড়ে বিলাইয়া অঁধারিল কত গুরু নিশা !
রক্ত-লোলুপ লোল-রসনায় দানিল নিজেরি অমৃত-তৃষা !
আজ তারি শেষ ! মোহ অবসান !—দেবতা-দমন যুগাবতার
আসে ওই ! তার বাজে দুন্দুভি—বাজায় দামামা, কাড়া-নাকাড় !
—কালাপাহাড় !

বাজে দুন্দুভি, তামার দামামা—বাজে কি ভীষণ কাড়া-নাকাড় !
অগ্নি-পতাকা উড়িছে ঈশানে, ঢুলিছে তাহাতে উল্কা-হার !
অসির ফলকে অশনি ঝলকে—গলে' য'য় যত ত্রিশূল-চূড়া !
ভৈরব রবে মুচ্ছিত ধরা, আকাশের ছাদ হয় বা গুঁড়া !
পূজারী অধির, দেবতা বধির—ঘণ্টার রোলে জাগেনা আর !
অরাতির দাপে আরতি ফুরায়—নাম শুনে হয় বুক অসাড় !
—কালাপাহাড় !

নিজ হাতে পরি' শিকলি ছু'পায়, দুর্বল করে যাহারে নতি,
হাত জোড় করি' যাচনা যাহারে, আজ হের তার কি দুর্গতি !
কোথায় পিনাক ? ডমরু কোথায় ? কোথায় চক্র স্তূদর্শন ?
মানুষের কাছে বরাভয় মাগে মন্দির-বাসী অমরগণ !
ছাড়ি' লোকালয় দেবতা পলায় সাত-সাগরের সীমানা-পার !
ভয়ঙ্করের ভুল ভেঙ্গে যায় ! বাজায় দামামা, কাড়া-নাকাড়,
—কালাপাহাড় !

বি স্ম র গী

কল্প-কালের কল্পনা যত, শিশু-মানবের নরক-ভয়—
নিবারণ করি' উদিল আজিকে দৈত্য-দানব-পুরঞ্জয় !
দেহের দেউলে দেবতা নিবসে—তার অপমান ছুঁবিষহ !
অন্তরে হ'ল বাহিরের দাস মানুষের পিতা প্রপিতামহ ।
স্তম্ভিত হৃৎপিণ্ডের 'পরে তুলেছে অচল পাষণ-ভার—
সহিবে কি সেই নিদারুণ গ্লানি মানবসিংহ যুগাবতার
—কালাপাহাড় !

ভেঙ্গে ফেল মঠ-মন্দির-চূড়া, দারু-শিলা কর নিমজ্জন !
বলি-উপচার ধূপ-দীপারতি রসাতলে দাও বিসর্জন !
নাই ব্রাহ্মণ, স্বেচ্ছ-যবন, নাই ভগবান—ভক্ত নাই,
যুগে যুগে শুধু মানুষ আছে রে ! মানুষের বুকে রক্ত চাই !
ছাড়ি' লোকালয় দেবতা পলায় সাত-সাগরের সীমানা-পার !
ভয়ঙ্করের ভয় ভেঙ্গে যায়,—বাজায় দামামা, কাড়া-নাকাড়,
—কালাপাহাড় !

ব্রাহ্মণ-যুবা যবনে মিলেছে, পবন মিলেছে বহিসাথে !
এ কোন্ বিধাতা বজ্র ধরেছে নবসৃষ্টির প্রলয়-রাতে !
মরুর মর্য্য বিদারি' বহিছে স্তম্ভার উৎস পিপাসাহরা !
কল্লোলে তার বস্ত্রারুণ-রোল !—কূল ভেঙ্গে বুঝি ভাসায় ধরা !
ওরে ভয় নাই !—মুকুটে তাহার নবারুণ-ছটা, ময়ূখ-হার !
কাল-নিশীথিনী লুকায় বসনে !—সবে দিল তাই নাম তাহার
—কালাপাহাড় !

বি স্ম র গী

শুনিছ না ওই—দিকে দিকে কঁাদে রক্ত-পিশাচ প্রেতের পাল !
দূর-মশালের তপ্ত-নিশাসে ঘামিয়া উঠিছে গগন-ভাল !
কার পথে-পথে গিরি নুয়ে যায় ! কটাক্ষে রবি অন্তমান !
খড়গ কাহার থির-বিদ্যুৎ ! ধূলি-ধ্বজা কার মেঘ-সমান !
ভয় পায় ভয় ! ভগবান ভাগে ! প্রেতপুরী বুঝি হয় সাবাড় !
ওই আসে ! ওই বাজে ছন্দুভি—বাজায় দামামা, কাড়া-নাকাড়
—কালাপাহাড় !

শব-সঙ্গীত

কলুজ্ঞেখানায় কাবাব করে' চোখের জলে আঁজল ভরি—
আমরা যে তায় মিটাই ক্ষুধা, আমরা যে তায় পিয়াস হরি !
ঘরের উঠান শ্মশান করে' শব হয়ে এই শব-সাধনা !
নিজের মুখেই আগুন দিয়ে চিতার ধোঁয়ায় কাজল পরি !

অমানিশার মুখের 'পরে রুষ্টিধারার ঝালর ঝরে,
সিঁথির 'পবে বিজ্জলী-সিঁদূর, মরণ-বিয়ের বাসর-ঘরে ;
বাজ যে তখন শম্ভু বাজায়, হাওয়ার মুখে ছলুধ্বনি—
গলায়-দড়ির মতন ধরি বধূর বাহু আদরভরে !

স্বপ্নের সোয়াদ পাইনে মোটে, ছপ্নের নেশায় ঘুর লেগেছে ;
আলোব আশা আর করিনে, অন্ধকারে সুর জেগেছে !
সত্ত-মরার মুখ যে হাসে—কোথায় আছে তেমন হাসি ?
শিবের চেয়ে শবের শোভা !—শিব যে হেথায় মূর্ছা গেছে !

সুইন্বার্ণের অনুসরণে

তোরে লোক ভুলে যাবে ; দেয়ালের দন্ধ মসী-রেখা—
তার চেয়ে বেশী কিছু তোর নামে নাহি র'বে লেখা
কালের দেউলে ! যথা ভোলে নর চেতনা-নিমেষে
প্রমাথী সে রিপূর রচনা—ভুলে যায় নিশাশেষে
দুঃস্বপন ; যেমতি সে অতি-পূর্ণ পাত্র হ'তে তার
স্বলিত মদিরাটুকু মৃগপ চাহে না ফিরে আর,—
ভুলিবে তেমনি তোরে আগত ও অনাগত লোক,
তোর ছায়া ভুলে' যাবে হেথাকার এই সূর্যালোক !
শুধু, যেই অগ্নিকশা হানিয়াছি আমি তোর মুখে,
তার ক্ষত—সেই মোর বিষদিক্খ বিষম যোতুকে,
সর্পদষ্ট মৃতসম মরিয়াও হইবি অমর—
শব হ'য়ে জাগিবি রে মৃত্যুহীন মরণ-বাসর !

বি স্ম র গী

আর আমি !—নেহারিবে যবে নর জ্বলদর্চিশিখা
লেলিহান, পশিবে শ্রবণে যবে শ্রুতি-বিভীষিকা
উদধির উন্মাদ কল্লোল, যবে সঙ্গীত তরল
অর্ন্ত হৃদি আর্দ্র করি' প্রণয়ীরে করিবে চপল,
যবে ওই কৃষিহীন নীল-নভ-উষর-অঙ্গন
দীর্ঘ করি, শীঘ্রদ্যুতি ইরস্মদ করিবে লজ্জন
যোজন-সমান ব্যোম !—সে আলোকে, পুলকে, ক্রন্দনে,
গীতোচ্ছ্বাসে, অধরে-অধর, আর বাহুর বন্ধনে,
সীমাহীন সমুদ্রের সারাদেহ-মর্ম্ম-শিহরণ
সেই আতট আক্ষেপে, আমারেই করিবে স্মরণ
সর্বলোক ! অর্চিবে আমার স্মৃতি নিত্য-মনোরমা,
গাঁথিবে সকল সাথে মোর নাম—অনন্ত-উপমা !

অকাল-সন্ধ্যা

এবার হ'ল না সখি, প্রাণ ভরে' গান-গাওয়া—
দিনভোর মেঘল-আলোকে,
বুকে লাগে বার-বার বাদলের ভিজা হাওয়া,
রূপ তোর লাগিল না চোখে !
এ দিবসে নাহি তাপ, শুকাল না পাতায় শিশির,
পথে-পথে পঙ্কিল পঙ্কল,
স্তুতি-বর্ষণ মেঘে দিকে দিকে ঘনায় তিমির,
দিবা-দেহে নিশার বন্ধল !
তোমার ও রূপ-সুধা পান করি যতবার,
ঔঁখি মোর জড়াইয়া আসে,
তোমার ও নীলাম্বরী—মুক্তাবলী মেখলার—
তারা যেন নিশীথ-আকাশে !
মর্ত্য-পারিজাত ওই দু' অধর শোণিত-বরণ,
পিপাসার মৃত-সঞ্জীবনী—

বি স্ম র গী

নিবিড় চুম্বন যার—মুমূর্ষুর সূচিকাভরণ,
নেচে ওঠে সকল ধমনী—
তা'ও আজ শ্লান, সখি, নাহি তায় জ্বালা উন্মাদন,
এ হৃদয়-মধুথ-বক্তিকা
গলিল না, জ্বলিল না প্রাণ-যজ্ঞে সযুত ইক্ষন,
ধূম্রনীল বাসনার শিখা !

কোথা বর্ণ, কোথা আলো, কোথা তোর ফুল-তনু
পরশ-হরষ-মোহকর ?
ইন্দ্রনীল-ইন্দীবরে মদনের ফুলধনু-
আরোপিত কটাক্ষ সুন্দর ?
হেম-পাত্রে সুরা হেন—নখমণি-বিখচিত
করপুটে আরক্তিম ছায়া ?
মর্ম্মর-মসৃণ তনু স্তনভারে আনমিত,
কামনার কল্পতরু কায়া ?—
যে-রূপ নেহারি' আমি রৌদ্রদীপ্ত নীলাম্বরে
ফুকারিব স্বজনের গান,
সর্ববদেহে সঞ্চারিবে আদিম আহ্লাদভরে
বিধাতার প্রয়াস মহান্ !
ছায়া যত কায়া হ'য়ে বিহরিবে ধরণীতে,
চেতনার পূর্ণ অবতার—
মানস-নিখিলে কোথা' অনালোক সরণিতে
করিবে না বিদেহ-বিহার ।

বি স্ম র গী

স্পর্শে-দর্শে শ্রুতি-হর্ষে হাস্ত-অশ্রু-বেয়াকুল,
জীবনে জীবন্ত পরিচয়—
কোথা সেই আত্মসৃষ্টি ব্রহ্ম-স্বপ্ন-সমতুল,
দ্রষ্টা যার ঋষিঋতুচয় ?

সেই রূপ ধ্যান করি' অঙ্গে মোর জাগিল যে
স্মুরং-কদম্ব-শিহরণ !
দেহ হতে দেহান্তরে বাঁধিলাম কি সহজে
প্রীতি-প্রেম-সেতুর বন্ধন !
পাপ-মোহ-লালসার লাল-নীল রশ্মিমালা
বরতনু ঘেরিয়া তোমারি,
লাবণ্যের ইন্দ্রধনু শোভা ধরে—নাই জ্বালা,
মুগ্ধ হ'নু আনন্দে নেহারি' !
তারপর যতবার হেরিয়াছি, সখি, তোর
নগ্ন তনু শুভ্র অশোচন,
মানস-কলঙ্ক-মসী, লোক-শিক্ষা স্নকঠোরি
অকাতরে করেছি মোচন ।
হৃদয়ে হৃদয় রাখি', ওঠে গুণি' সব রস
—ক'ল সিন্ধু গীত-রসায়নে,
ও রূপ-দীপক-রাগে দাহ করি' অপযশ,
দেহ-দীপ জ্বালানু যতনে ।
প্রেম আর পরমায়ু—এর লাগি' যত ব্যথা,
মানবের তৃষা চিরন্তন ;

বি স্ম র ণী

দেবতা-দোসর বীর, তারি পবাজয়-কথা,
সে হৃদয়-সাগর-মস্থন ;
নীলাকাশে উষাসম গরলে অমৃত-বাগ,
মৃত্যুজয়ী জীবন-কাহিনী—
যুগান্তের নিশিভোরে নিকষে সোনার দাগ
কষি' দিল, হে মনোমোহিনি !

প্রাণভরা সেই গানে লেগেছে হিমেল হাওয়া,
আজি এ দিনাস্ত-বরষায়
নেমেছে অকাল-সন্ধ্যা, বৃথা মুখপানে চাওয়া,
ছন্দ নাই, ভাষা না জুয়ায় !
আমাব প্রাণেব কূলে উদিয়াছে সন্ধ্যাতারা,
মধ্যাহ্নের রবি অন্তমান,
আলোক-বিহীন দিবা হইয়াছে কপহাবা,
তুমি সখি স্বপন-সমান !
নিদ্রাহাবা দীর্ঘবাত্রি কেমনে হইব পার
দ্রুস্তর তিমিব-তবঙ্গিনী ?
বনপথে-পথে শিবাদের অশিব চীৎকাব,
তৃণদলে ঝিল্লির শিজিনো !
কভু বা করিবে নৃত্য শব্দহীন অর্দ্ধরাতে
নিশাচরী বিজন অঙ্গনে,
ঝঙ্কারিবে অলঙ্কার মালিনী কি স্রঙ্খবাতে,
কঙ্কালের কেযুবে কঙ্কণে !

বি স্ম র গী

তার মাঝে কোথা তুমি ? হা অভাগ্য পুরোহিত !

কোথা আশা, কোথা সে পিপাসা ?

প্রাণযজ্ঞে দেহ কোথা ? কোথা রক্ত স্নোহিত ?

সঞ্জীবন শক্তি-মন্ত্র-ভাষা ?

দীপ-শিখা

তপন যখন অন্ত-মগন ভুবন-ভ্রমণ-শেষে,
আমি তপনের স্বপন দেখি গো, পথিক-বধূর বেশে ।
সারাদেহে মোর জ্বালিয়া অনল,
এলাইয়া দিই ধূম-কুন্তল,
কালো-অঞ্চল ছায়া হ'য়ে লোটে চরণের তলদেশে,
মোর দেহময় দাহনের জয় তপনের উদ্দেশে ।

মাটির বাটিতে স্নেহরস শুধি', বৃন্ত সে বর্তিকা
ফুটায় হরষে তিমির-তোষিণী চম্পা-রূপিণী শিখা ;
বৃন্ত বাহিয়া যত স্নেহরস
যোগায় আমার জ্বালার হরষ—
আমি তৃষিতের প্রাণের নিশীথে বাসনা-বাসন্তিকা !
ধূম নয়, সে যে অলি-লাঞ্জন কাঞ্চন-মল্লিকা !

বি স্ম র ণী

আলোকের লাগি' আঁধার-প্রাচীরে নিশা মরে মাথা কুটে',
আমি সে ললাটে রক্তের ফোঁটা দিকে দিকে উঠি ফুটে !

কালোর অঙ্গে আলোকের ক্ষত—

সারারাত জাগি নিমেষ-নিহত,
জাগর-রক্ত আঁধির কাজল অশ্রুতে নাহি টুটে,
যত সে জ্বলুক, কালিটুকু থাকে লাগিয়া অক্ষিপুটে !

* * *

দিক্-অঙ্গনা গগনাস্তনে ফুল্কির ফুল গাঁথে—
অবোধ বনানী তাই হেরি' পরে জোনাকীর হার মাথে !

মিছা মায়া সেই আলোর কণিকা,

মিছা হাসি হাসে আঁধার-গণিকা—

রক্ত-বিহীন পাণ্ডুর ভাতি, তাপ নাই তার সাথে,
বিজ্রপ করে সখের দীপালি স্তম্ভ দিবস-নাথে !

আমি যামিনীর নীল অঞ্চলে আগুনের ফুল বুনি,
আমি আঁধারের বুকের বাঁ-ধারে হৃদ-স্পন্দন শুনি !

দিবা পুড়ে' মরে স্বামী'র চিতায়—

আমি ছিনু তার সিঁদূর সিঁথায়,
জ্বলে' উঠে শুনি ভর-সঙ্কায় ঝিল্লির বুনঝুনি ;
আমি সারারাত কাল-রাত্রির আয়ুর প্রহর গুণি !

আমি দীপ-শিখা—আলোক-বালিকা—বসি যবে বাতায়নে,
দূর প্রান্তরে আলেয়া-ডাকিনী মিলায় আঁধার সনে ;

বি স্ম র গী

নিশার ছলল প্রেত-কবন্ধ

নৃত্য অমনি করে যে বন্ধ !

উদগত-পাখা পিপীলিকা মরে রূপশিখা-চুম্বনে !

আমি বহির তস্থী কুমারী তপনেরে জপি মনে !

আমি নিয়ে যাই অধীরা বধূরে অচেনার অভিসারে,
দেব-আয়তনে আরতি করি গো প্রেমহীন দেবতারে ।

আমি কালো-চোখে পরাই কাজল,

বাসর-নিশাটি করি যে উজল,

আমি চেয়ে থাকি অনিমিত্ত-আঁখি মরণ-শয়নাগারে ;

প্রলয় ঘটাই, তবু নিবে যাই মলয়ের ফুৎকারে !



অগ্নি-বৈশ্বানর

বিশ্বনরের বন্ধু যে তুমি, তাই নাম তব বৈশ্বানর !
তুমি অমর্ত্য, মর্ত্যের সাথে বাস কর তবু নিরন্তর !
নিত্য তোমার জন্ম-নূতন, অরণি তোমাতে প্রসব করে—
ওগো প্রমত্ত ! প্রসবি' তোমায় মাতা-পিতা যে গো পুড়িয়া মরে !
তুমি হিরণ্যদন্ত, তোমার পিঙ্গল জটা, পৃষ্ঠ নীল,
তব অদ্ভুত জন্ম স্মরিয়া বিস্মিত মোর মরণ-শীল !
তুমি যবিষ্ঠ, দেব-কনিষ্ঠ, চির-নবজাত সত্ত্ব-যুবা !
যজ্ঞ-সারথি, সোম-গোপা তুমি, তুমি মৃতাহারী ভরগু বা ।
ঋষিদের ঋষি, তুমি যে অশ্বর, পুরোধা যে তুমি অশেষ-মেধা,
তুমি হতাশন, অপাদশীর্ষ !—প্রণমি তোমাতে হে জাতবেদা !

বি স্ম র গী

ওগো গৃহপতি, গৃহের অতিথি, ওগো দেবদূত হব্যবহ !
মৃত দারুদেহে অমৃত-অগ্নি—কেমনে বা তুমি লুকায়ে রহ !
ওগো জল-জ্ঞ ! বৃষসম পুন লালিত যে তুমি জলেরি কোলে,
তুমি জলচর লোহিত হংস, জলে জ্বালাময় পক্ষ দোলে !
শ্যেনসম তুমি আকাশে বিচর, মহী 'পরে তুমি ক্রুদ্ধ অহি,
বিশ্বতোমুখ ! ওগো বরেণ্য ! পাবক তুমি যে—পাতক দহি' !
উদয় হও গো উজ্জ্বল রথে, বিদ্যুৎ-বিভা হিরণ্য !
ওগো তেজস্বী, মিয়ে এস তব অরুণবর্ণ অশ্চয় !
হোতা সঁপে তোমা ইক্ষন নব, গ্রহণ কর গো এই সমিধ্—
মর্ত্যের জ্ঞাতি, অমৃত-বন্ধু ! প্রণমি তোমারে বিশ্ববিদ !

আকাশে কৃশানু, বাতাসে অশনি, মর্ত্যে অগ্নি-বৈশ্বানর—
মহা-অরণ্য-দাহন মূর্ত্তি স্মরি গো তোমার ভয়ঙ্কর !
শতগবীযুত পুঞ্জব যেন বাহিরাও তুমি বনের পথে,
অশ্বরে ধায় ধূম-কদম্ব—কেতু সে তোমার মরুৎ-রথে !
চৌদিকে উড়ে উল্কার মালা, গ্রাস করে যত তৃণের রাশি,
পাখীরা শাখায় ভয়ে মূরছায়, পশুরা পলায় সহসা ত্রাসি' !
তব ক্ষুরধার দংষ্ট্রা-শিখায় মেদিনী-মুণ্ডে জটীর ভার
ঘুচাও নিমেষে, শ্মশ্রু যেমন ঘুচায় নিপুণ ক্ষৌরকার !
সিন্ধু-সমান গর্জ্জন কর, সিংহের মত হুহুকার !
ওগো জ্বালাকেশ ! কৃষ্ণবজ্র ! প্রণমি তোমারে বারম্বার ।

বি স্ম র গী

আদিতে আছিলে অদিতির সাথে আকাশের নীল পদ্মবনে,
ঘর্ষণে কার গগনে গগনে উজলিয়া জাগো কি নিঃশ্বনে !
আস্তু তোমার জ্যোতির্হাস্ত, ঘোর তমিস্রা তুমিই হর,
নিবিড়-অঁধার নিশার ওপারে দৃষ্টি তোমার প্রেরণ কর !
হে মধুজিহ্ব ! সপ্ত জিহ্বা প্রসারিয়া দাও আজি এ প্রাতে,
মিশে যাক তব পিঙ্গল জটা ওই বালারুণ-রশ্মি সাথে !
শত্রু মোদের নিপাত কর গো, বর দাও, দেব ! বৃষ্টি দাও,
আর কৃপা কর কবিরে তোমার—মন্ত্র শোধন করিয়া নাও !
ওগো ত্রিজন্মা ! ত্রিশিখ ! ত্রিতনু ! ও গো গৃহ-ভানু ! রাত্রি-রবি !
পরমাত্মায় !—প্রসাদ হে সখা ! জুহু ভরি' এই দিলাম হবি ।

নূরজহান ও জহাঙ্গীর

মহবৎ খাঁ নূরজহানের শত্রুতায় ভীত হইয়া সম্রাটের কাবুল-যাত্রাকালে হঠাৎ শিবির আক্রমণ করিয়া তাঁহাকে বন্দী করেন। কথিত আছে, এই সময়ে একবার তিনি সম্রাটকে মন্ত্ৰণায় বশ করিয়া এবং কতকটা বাধ্য করিয়া নূরজহানের প্রাণদণ্ডাজ্ঞা স্বাক্ষর করাইয়া লন। অতঃপর সম্রাজ্ঞী উক্ত আদেশপত্র হস্তে লইয়া সম্রাটের সহিত সাক্ষাৎ করেন।

নূরজহান ও জহাঙ্গীর

স্থান—কাবুলের পথে বাদশাহী শিবির। কাল—মধ্যাহ্ন।

[বিস্তৃত গালিচার উপরে বাদশাহের গদি। সম্মুখে বহুমূল্য খাঞ্চায় নানাবিধ কাবুলি-মেওয়া, স্বর্ণপাত্রের শরবৎ ও মদিরা। বাদশাহ নিভৃত্তে বিশ্রাম করিতেছেন। গালিচার একপ্রান্তে খোলা-কানাতের ফাঁক দিয়া খানিকটা রোদ্দ আসিয়া পড়িয়াছে, এবং দূরে নীল আকাশের নীচে তুষার-ধবল গিরি-শ্রেণী দেখা যাইতেছে। মহবৎ খাঁ এইমাত্র প্রবেশ করিয়া বাদশাহকে নূরজহানের আগমন-চেষ্টা জানাইলেন, ও নীরবে আজ্জাবহ অনুচরের মত একপার্শ্বে দাঁড়াইয়া রহিলেন; তাঁহার মুখ যেমন তেজোব্যঞ্জক, তেমনি বিষন্ন-গম্ভীর।]

জহাঙ্গীর

মহবৎ, তুমি বড় বে-অকুফ ! হাতে দিয়ে পরোয়ানা—
এই বাদশাহী-পাঞ্জার ছাপ, ফের তারে ডেকে আন !
আমার হুকুমে বিশ্বাস নেই, বিশ্বাস হ'ল তারে।
বীর বটে, তবু মাথায় মগজ কিছু নাই একেবারে !

বি স্ম র গী

এ-কাজ করিতে দুইবার ভাবে !—তবেই হয়েছে সারা !
এ যে একেবারে মরীয়ার কাজ !—চোখ বুজে' ছুরী মারা !
বেহেশত্ চাও ত চেয়োনা সে মুখে—নহে সে নূরজহান !
জাহান্নামের নূর বটে সেই !—সুন্দর শয়তান !
আল্লার নাম জপ কর, আর তলোয়ার রাখ সিধা,
দূর কর যত হিসাব-নিকাশ, বিচারের মুসাবিদা !
এ সব কী ফুল ? গুল্-আস্রফি ?—ফুলে কাজ নাই আজ !
রোদ টেলে হোক লাল-গালিচায় খুন-খারাবির সাজ !
চাহি না বরফ, শরবৎ মিঠা, খরমুজ্জা কাশ্মীরী—
দিল্ করে' দাও শরাবে দরাজ—দেখাব বাদশাগিরি !...
ঠিক বটে, তার বহৎ কসুর !—মাফ কিছুতেই নয় !
খশ্রুকে খুন সেই করায়েছে—তারি কাজ নিশ্চয় !
খুরম আজিও বিদ্রোহী হয়ে দিকে-দিকে পলাতক,
তারি ফন্দীতে তুমিও নারাজ,—আমি কি আহাম্মক !
আমি রাজা, যার এত কোটী প্রজা মুখ চেয়ে মরে বাঁচে,—
আমি কিনা ফিরি যোড়-হাতে এক রমণীব পাছে পাছে !
আর কথা নয়,—ঠিক, মহবৎ ! বড় তুমি হুঁশিয়ার !
এমন সময়ে এমন বন্ধু সত্যই পাওয়া ভার !...
কাল রাতে এক স্বপন দেখেছি তাজ্জব আজ্-গবি !—
আমারই কেল্লা লাহোর যেন সে—তারি মত এক ছবি !
মাঝখানে তার মস্ত মিনার—আকাশে ঠেকেছে মাথা !
এত উঁচু,—তবু জমিন্ হ'তে সে সমান সোনায়ে গাঁথা !
নীচে চারিদিকে আলো-আব্-ছায়া, আস্মানে একরাশ
কিসের আতশ ?—দেখি, তার সেই মিনার-চূড়াতে বাস !

বি স্ম র ণী

হঠাৎ একটা হাতী কোথা হ'তে ছুটে এসে দেয় ঠেলা,—
থাম ভেঙে গেল, আলো নিবে গেল—এমনি তামাসা-খেলা !
জেগে উঠে তবু ভয় হ'ল মনে—এ যে বড় বিপরীত !
পাগ্লা হাতীর এক ঠেলাতেই ভেঙে গেল তার ভিত !
না, না, ভালো নয় ! থাঁ সাহেব, তুমি কি বল ? কেমন লাগে ?
আমার মাথা ত গোলমাল করে, শরাবের নেশা ভাগে !
কথা কও না যে ! বড় বেতমিজ্ !—

আরে, আরে !—একি ! একি !
মহবৎ ! ধর ! সরাও পেয়ালা !—সেই আসে, ওই দেখি !
এয় খোদা ! এই পেয়ালার বিষ লাল করে শুধু চোখ—
ওর পানে চেয়ে নীল হয় খুন !—এত বিষ গুল্-রোখ্ !
জোয়ানী সাবাস !—সেই কালো-চোখ কালো-জহরের ছুরা !
ছেঁড়া-কলিজার খুন-মাথা সেই ঠোঁটের গোলাব-কুঁড়ি !
এতকাল পরে এ-রূপ কোথায় ফিরে পেল আরবার ?
আরে, আরে !—এই জান্‌খানা টেনে চিরদিন জেরবার !

* *

মেহেরুন্নিসা ! এ বেশে এমন অসময়ে আগমন ?
হুকুম ছিল না—আদব ভুলেছ ? ভালো নাই মোর মন !
শাহ-বেগমের ইজ্জৎ কোথা ? ওড়্‌নাও গেছে ঘুচে' !
খালি পায়ে নেই জুতাটুকু ! বুঝি শরম ফেলেছ মুছে' ?

নূরজহান

কার ইজ্জৎ আলা-হজ্জরত ?—হাসি পায় শুনি' কথা !
এত অভিনয় শিখিলে কোথায়—কে শিখাল চতুরতা ?

বি ন্ম র গী

সেলিম কখনো সেলাম শেখেনি, ছিল শুধু শাহজাদা—
জহাঙ্গীরের প্রেম যত বড়, ছল নয় তার আধা !
মুখে-বুকে এক !—মোগলের মান সেই রাখিয়াছে জানি,
ইরানের মেয়ে বিদেশী মেহের তাই ছিল অনুমানি' !—
আজ এতদিনে একি পরিচয় !—বুকে এক, মুখে আর !
নূতন পীরের নূতন মুরিদ !—বাহবা, চমৎকার !
বাদশার সাথে বেগমের দেখা !—বড় তার ইজ্জৎ !—
এখনো সমুখে দাঁড়াইয়া তাই গোলাম মহব্বৎ !
তামাসার কথা ভালো নাহি লাগে, সে সময় আজ নাই,
বুকে যাহা ছিল, মুখ ফুটে তার কিছু ক'য়ে যেতে চাই ।
শাহ-বেগমের নাম শুনে আজ ঘৃণা হয় আপনারে !
ভিখারিণী কোনো প্রজার মতও আসি নাই দরবারে !
জীবনের প্রভু ছিল যেই মোর—মৃত্যু-মুরতি তার
ভেটিবার তরে, রমণীর এই দীনহীন অভিসার ।
স্বামী বটে, তবু আজ আমি তাঁর নই যে সৌমস্বিনী—
ঘরে নয়, আজ মশানে চলেছি !—কঙ্কণ-কিঙ্কিণী
খুলিয়াছি তাই,—জীবনে আক্ৰ, মরণে পর্দা নাই !—
ছুনিয়ার শেষে কার কাছে লাজ ?—ওড়না পরিনি তাই ।
মরণের ঘাট পিছল নহে কি ? জানো না কি জাহাঁপনা ?—
কতটুকু পথ ? কি কাজ পরিয়া জুতা সে জরীতে বোনা ?
বেয়াদবি যদি হয়ে থাকে তবু, দাও তারো তরে সাজা,
মরণের বাড়ি সাজা আছে জানি, তাই দাও তবে, রাজা !

বি স্ম র গী

জহাঙ্গীর

বৃথা অভিমান, মেহের !—তোমার স্বামী শুধু নই, নারী,
এই দুনিয়ার বাদশা যে আমি, সে কথা ভুলিতে পারি ?
ঘোর অপরাধে অপরাধী তুমি—রাজ্যেরি দুঃখমন্ !
আয়ের সৃক্ষম-বিচারে তোমার মৃত্যুই নিরুপণ !
তার লাগি' বৃথা দৃষ্টিও না মোরে—

নূরজহান

থাক থাক, বুঝিয়াছি—

ওই মুখে এই মিথ্যা শুনিয়া না মরিতে মরিয়াছি !
যে-আসনে বসে' দণ্ড ধরেছে আকবর হুমায়ুন,
তুর্কীর চূড়া বাবরের নামে দাম যার দশগুণ—
আজ তার মান রাখিবার তরে মিথ্যার আশ্রয় !
অসহায়্য এক নারীর সমুখে সত্য বলিতে ভয় !
এত কাপুরুষ ছিল না সেলিম—মেহেরের মনোচোর !
হায় নারী, একি জীবনের ভ্রম !—এই কি পুরুষ তোর !
অপরাধ মোর যত বড় হোক, তারো চেয়ে অপরাধী
দাঁড়ায়ে সমুখে,—রাজ-বিদ্রোহী !—রাজারে রেখেছে বাঁধি' !
জল্লাদ কোথা ? শূল পোঁতে নাই ? মরা-মহিষের খালে
সিলাই করিয়া, রোদে রাজপথে ফেলে নাই এতকালে !
এই দুনিয়ার বাদশা যে তুমি, সে কথা ভুলিতে পারি—
ভুলিতে পারি না—যে জন নফর তুমি যে গোলাম তারি !

বি ন্ম র গী

জহাঙ্গীর

কহিও না আর ! চুপ কর ! একি পাগলের চীৎকার !
মহবৎ তবু কথাটি কহেনি, বীর সে নির্বিবকার !
জানি মিছা-কথা, বন্ধু, তোমার মনে নাই কোনো পাপ,
কোনো কথা এর লই নাই মনে, করিও না অনুতাপ ।
কি কথা বলিতে আসিয়াছ, নারী,—শেষ করে লও সব,
গালি দিও নাক' অকারণ মোরে, কেন মিছা কলরব ?
এসে থাক যদি মাফ চাহিবারে, বল তবে সেই কথা,
নহিলে আরো যে কঠিন হবে সে—ব্যথার উপরে ব্যথা !

নূরজহান

হা মোর কপাল ! এতখনে বুঝি এই হ'ল পরিচয় !
মাফ চাহিবারে আসিয়াছি আমি—এতই মরণ-ভয় !
এই পরোয়ানা পায়ে দ'লে ছিঁড়ে, ফিরে' দিতে আমি চাই !-
মহবৎ ! ওই বন্দী, না তুমি বাদশা—শুনিতে পাই ?
তোমার হুকুম মানিবে কি আজ দিল্লীর সুলতানা !
তুমি হবে তার জানের মালিক !—খুন কর—নাই মানা ।
পরোয়ানা কেন ?—ছুরী হানো ! এই বুক পেতে দিই আঁ
নারীহত্যার পাতক তোমার—সাক্ষী তাহারি স্বামী !...

মরণের ভয় করি না যে, তাই আসিয়াছি, প্রিয়তম,
তোমারি ও-হাতে সঁপিতে এসেছি আজি এ জীবন মম ।

বি শ্ম র গী

বল শুধু তুমি—আপনার মুখে, স্বাধীন-মনের বলে—
জীবনের বোঝা নিতেছ তুলিয়া নিজেরি হাতের তলে !
বল, তুমি নও বাদশা এখন—এ দাসী বেগম নয়,
প্রাণের সহজ অধিকারে তুমি কর মোর পরিচয় ।
বল, স্ত্রী হব—রাখো মিছা কথা—দোহাই তোমার স্বামী !
বল শুধু মোরে, ‘মেহের, তোমার মরণে বাঁচিব আমি’ ।
সেই আশাসে আসিয়াছি ছুটে, লাইলীর মেয়ে ফেলে—
যারে কোলে নিয়ে সেদিনও লড়েছি, ঝিলামের শ্রোত ঠেলে,
হাতীর উপরে,—জানে মহবৎ—একদিকে তারে ঢাকি’,
আর দিকে ধনু, যতখন তুণে একটিও তীর বাকী ।
সেও তোমা লাগি’—ভেবেছিছু, বুঝি বড় প্রয়োজন মোরে,—
জানিনি তখনো, এমন বন্ধু জুটেছে কপাল-জোরে !
আজও তাই ফের জানিতে এসেছি—তোমারি কি প্রয়োজন ?
বল একবার !—‘শুমি’ সেই কথা শাস্ত হউক মন ।...

মনে পড়ে সেই খুশ্‌রোজ-রাতি ?—স্মৃতি-কেনার ছলে,
মোতি-মসলিন-জহরত্‌ ফেলে চাহিলে ওড়না-তলে ।
হেসে कहিলেন রাকিয়া-বেগম—“উহার নমুনা নাই,
রংমহলের রং নয় ওয়ে, ও-কাজল কোথা পাই ?
তবু চিনে রাখ—তুমি যে হনরী !—দেখ দেখি ভালো কিনা ?
এর চেয়ে ভালো—মস্মরে ফোটে কালো-পাথরের মিনা ?
এমন নরম ছায়াখানি পড়ে ‘সোরু’-তকটির মূলে—
ঘাসের জাজিমে, জ্যোৎস্না-চাদরে—যমুনার উপকূলে ?”

বি স্ম র গী

মুখ খুলে দিয়ে, থুঁতি তুলে ধরে', চাহিলেন রাজ-মাতা,
চোখে-চোখে সেই একবার চেয়ে ঢুলে' নুয়ে প'ল মাথা !
তুমি চলে' গেলে, বিবশ-বিভল, পাণ্ডুর বেদনায় !
শুনিবু, সেলিম শাহজাদা সেই !—হারাইবু চেতনায় !
সেই দিন হ'তে মেহের মরেছে, সে-মরণ আজি শেষ !
এখনও আঁখিতে দেখ আছে কিনা জীবনের মোহ-লেশ ?
চাও একবার !—মিনতি তোমায়—কোন ভয় নাই আর,
এখনো কি হয় খুশ'রোজ-খেলা, বাদশাহ ছনিয়ার ?
খেয়ালি-ফানুসে কত রঙ ধরে যৌবন-যাদুকর !—
লজ্জা কি তায় ? কুৎসিতও হয় মনোহর সুন্দর !
একদিন যারে ভালো লেগেছিল, বেসেছিলে তায় ভালো,
হয়ত তারেই মনে হয়েছিল—এই 'জগতের আলো' !
আজ যদি তার রূপের প্রদীপে পলিতায় পড়ে কালি,
রংমহলের দুধের দেয়ালে কলঙ্ক লাগে খালি—
নিবাইয়া দাও আপনার হাতে !—ডেকো না চেরাগ্‌চীরে !
যে-হাতে জ্বলেছ তাহারি হাওয়ায় শেষ কর শিখাটির !
আঁচ লাগিবে না, তাপ নাই তায় ! জ্বালা কোথা জুড়াবার ?
দেখ—হাসিতেছি, এ হাসিতে নেশা এখনো কি লাগে আর ?

জহাঙ্গীর

ভয় করে, নারী, আজও ভয় করে !—চেয়ো না অমন করে' !
সেলিম মরেনি, মেহের মরিলে তবে ত যাইবে মরে' !

বি স্ম র গী

মেহের ! তোমার মোহনী স্মরত্ !—পরীরাও ফিরে চায় !
আজও মনে হয়, সেই খুশ্‌রোজ ওই চোখে চমকায় !
কোথা হ'তে এলে, মরু-মঞ্জরী ! আগ্রার উঠানে ?
ও-রূপের ছায়া পেয়ালায় পড়ে' আগুন লাগাল প্রাণে !
ছিল যে মাতাল, মদেরি নেশায় দিনরাত মশ্‌গুল—
পাগল করিয়া দিলে কেন তারে ?—এক নসীবের ভুল !
বাদশার ছেলে বিকাইয়া গেলু এক বস্রাই গুলে !
খোদার বান্দা বৃত্‌-পরস্ত্—আখেরের ভয় ভুলে' !
কোথায় ইমান পৌরুষ গেল ? কি মোহিনী জানো, নারী !
মোগলের তখ্‌ত ফুলদানী হ'ল ! কালো-চোখ তরবারি !
রুটী ও পেয়ালা সার হ'ল শুধু—স্বপনে কাটাই দিবা,
রাজ্যের খোঁজ মালিক রাখে না, বাড়িছে প্রলয়-বিভা !
নফর করেছে নজরবন্দী, কাল দাঁড়াবে সে বৃকে !—
কার তরে আজ এ দশা আমার ? মজেছিলু কোন্‌ স্তখে ?
সেই স্মখ আজও উথলিয়া ওঠে—ওই মুখে যদি চাই !
দোজোখ্‌ বেহেশ্‌ত্‌ এক হয় দেখি, জ্ঞান-হারা হয়ে যাই !
আমি অপরাধী—এ কথাও ঠিক !—কি হ'ল ? কাঁদিছ ! ছি !—
শুনিছ না কিছু !—ওই দিকে চেয়ে অমন ভাবিছ কি ?

নুরজহান

কিছু নয় !—শুধু ওই ফুলগুলা—গুল্‌-আশ্‌রফি বুঝি ?
বাংলা-মুলুক মনে পড়ে' যায়, কি যেন্‌ হারিয়ে খুঁজি !

বি স্ম র গী

ওরি মত ঘোর-সোনেলা গোলাব ফুটিত বর্কমানে,
কি জানি কেন যে—ওই রং চোখে ছুঁ করে' জল আনে !
তাই ভুলেছিছু হঠাৎ কেমন !—শুনি নাই শেষ-কথা,
গোস্তাকী মাফ কর একবার, না জেনে দিয়েছি ব্যথা !

জহাঙ্গীর

আমার ভাগ্যে এই ছিল শেষ !—মহবৎ ! মহবৎ !
ভরা-দুপুরেই দিন ডুবে যায় ! ঝুটা তেরি শরবৎ !
পেয়ালার পর পেয়লা ভরেছি—বেহুঁস করেনি দিল !
মাথাও ঘোরে না, রক্তের জোশ্ বাড়ে না যে একতিল !
যাক ! সব যাক ! লাধি মেরে ভাঙে ! কর সব চুরমার !
কাজ নাই মোর বাদশাহী তখ্ ত—দিল্লীর দরবার !
ঘোড়া নিয়ে এস—থুরে ক্ষয় করি সারা হিন্দুস্থান !
শহর-কেলা জ্বালাইয়া দিয়া রাঙাইব আস্‌মান !
তৈমুর ! আজ তোমার বংশে খনের পিপাসা নাই ?
বিষের জ্বালায় বুক জ্বলে, তবু বসে' থাকে এক-ঠাই !
যেথা যত আছে সুন্দর মুখ—কাটিয়া পাহাড় কর !
কালো-চোখ সব ছিঁড়িয়া ছিঁড়িয়া হাজার থলিতে ভর !
মস্‌জিদ হোক ঘোড়া-ঘর, আর হারেম কসাই-খানা !
আল্লার নাম করে যদি কেউ, টুঁটি কেটে কর মানা !
বুক ফেটে যায় !—এও কি আমার শাস্তির শেষ নয় !—
ওরে হতভাগী ! নাই তোর মুখে এতটুকু বিস্ময় !

বি স্ম র গী

চেয়ে আছ তবু অচপল চোখে, দয়া নাই মনে তোর !
রাক্ষসী ! আমি সব দিয়েছি যে ! তবুও আমিই চোর !...
মহবৎ ! আমি তোমার মতন দেখিনি শিকারী-বীর—
এত বড় এই বাঘের পাঁজরে তুমিই বিঁধিলে তীর !
তবে আর কেন ? বাঘেরে ধরিয়! বাঘিনীকে ছেড়ে দাও !

নূরজহান

ছি-ছি, ছি-ছি ! এই দাঁড়াইনু আমি, নড়িব না এক পা'ও !
কেন অপমান কর আপনার ?—তোমারি হুকুম ঠিক !
মহবৎ তারে ফিরাইয়া দিবে !—ধিক্ তায়, ধিক্ ! ধিক্ !
মরিতে চাহিনি একদিন বটে—এমনি সে পরোয়ান।
পেয়েছিঁনু, সে যে পাঁচ-আঙুলেই রক্তের সই টানা !
সঙ্গে তাহার দিয়েছিল ছুরী—জ্যোৎস্নায় তুলে ধরি'
দেখি সে কঠিন ইস্পাতময় অশ্রু পড়িছে বারি' !—
সেদিন পারিনি, বড় সাধ হ'ল বাঁচিবারে পুনরায়,
সারারাত তাই বৃকে করি' শেষে ফেলে দিমু দরিয়ায় !
পিছনে যেন কে চূলে ধরি' মোর, তুলে নিয়ে গেল টানি'—
তারি বেদনায় মূরছিয়া ফের জাগিলাম রাজরাণী !
ভিখারীর মেয়ে মেহেরের ভালে তুমি দিলে রাজটীকা—
মোতিমহলের শামাদানে জ্বলে আলেয়ার আলো-শিখা !
রূপের রূপায় কেবা কিনিয়াছে সব-সেরা দৌলত ?—
তোমার তাজের কোহিনূর নয়—হৃদয়ের সেলামত !

বি স্ম র গাঁ

রূপের কদর জানি খুব জানি !—তস্বীয়ে হয় আঁকা,
রূপ সে বিকায় কানা-কড়িতেই, তস্বীর লাখ-টাকা !
কেউ ঝরে' যায়, কেউ বা লুকায় অশ্রু কুয়াসায় !
বাঁদী-হাটে কেউ শিকলিতে বাঁধা, হতাশ নয়নে চায় !
মেহেরের চেয়ে অনেক রূপসী রূপের পসরা নিয়া
ঘরে-ঘরে কেঁদে ফিরে গেছে এই ধরণীর পথ দিয়া !
নুরজহানের রূপ বড় নয়—বড় ওই বুকখানা !
তাই মানি নাই আর-একজনের মরণের পরোয়ানা ।...
হে মোর বিধাতা ! নিয়তি আমার ! দরদী গো নির্দয় !
জনমের মত ঘুচাইয়া দাও তোমার প্রেমের ভয় !
মরিয়াও আমি মরিব কি সখা !—ঘুমাইতে পাব স্থখে ?
কবরে আমার ভালো করে' দিও পাথর চাপায়ে বুকে !
যদি কোনোদিন আবার কখনো নাম ধরে' ডাক তায়—
মাটির মাঝারে মরা দেহ উঠি' বসিবে যে পুনরায় !
দোহাই তোমার !—যা-কিছু বিচার শেষ কর এই বেলা,
বল, বল—এই প্রাণটারে নিয়ে সাঙ্গ হ'ল কি খেলা ?

জহাঙ্গীর

ভালো করে' কাঁদো !—ঢাকিও না মুখ—এত শোভা, মরি মরি !
হাহা করে প্রাণ, তবু মনে হয় দেখে লই আঁখি ভরি' !
ওই মুখ যবে জলে ভেসে যাবে আল্লার দরবারে,
'রোজ্-কিয়ামত'-ভেরীর আওয়াজ থেমে যাবে একেবারে !

বি স্ম র ণী

যত পাপ, 'গোনা',—ছুনিয়ার যত বান্দার বেইমানি—
মাফ হয়ে যাবে ! শয়তান এসে দাঁড়াইবে ষোড়পাণি !...
মহবৎ, তুমি পাথর বনেছ ! কোনো কথা নাই মুখে !
এত বে-দরদ !—কলিজায় দোল দেয় নাকি ওই বুকে ?
এখনো দাঁড়ায়ে কি দেখিছ বীর ? আরো কি বিচার চাও ?
বলিও না কিছু—আর বলিও না !—ছেড়ে দাও, ছেড়ে দাও !
আদেশ নহে সে, মিনতি আমার !—কি ভাবিছ মহবৎ ?

মহবৎ খাঁ

যেমন আদেশ বান্দার 'পরে—তাই হোক হজ্জরত্ !

মাধবী

শরতের রবি প্রহরে প্রহরে ঢেলেছে তপ্ত সোনা,
নীলের পাথারে শাদা-মেঘেদের সারাদিন আনাগোনা ।
সন্ধ্যা তখনো হয় নাই, পথে চলেছি মাঠের পানে,
থমকি' দাঁড়ানু—ডাহিনে অদূরে ইঁদারাটি যেইখানে ।
উঁচু পাড় তার, তলাটি বাঁধানো, তক্তকে চারিধার,
একটি সে বড় বকুলের তলে একটু সে আঁধিয়ার ।
সেইখানে দেখি, অপরূপ একি ! তখনি লইলু চিনি'—
অস্ত-মেঘের লাল বাস পরি' দাঁড়ায়ে সৌদামিনী !
নটকনা-রং শাড়ীটির ভাঁজে দেহের সকল রেখা
নত-উন্নত তনুটির তটে ছবিটির মত লেখা ।
মুখটি আড়াল, খোঁপাটি আতুল—দোপাটির ফুল তায়,
গগু, চিবুক, একটু সে গ্রীবা, হাতখানি—দেখা যায় ।
আলোকের শিখা বেড়িয়াছে যেন শুভ্র সে ফুলতনু—
সবটুকু তার দেখা নাই যায়—শরতের রামধনু !

বি স্ম র গী

তবু মনে হয়, হেরিলাম যেন সবটুকু আঁখি ভরি',
ষোলকলা যেন নিমেষে পূরিল সপ্তমী-বিভাবরী !
না-দেখা সে মুখ আভাসে হেরিনু অন্তর-আঁখি দিয়া—
কত জীবনের পরিচয় সে যে, চির-জীবনের প্রিয়া !
তাহারি মূরতি গড়িয়া তুলিনু সকলের-গাওয়া গানে,
ধরিলাম তায় ছায়া-আলো-আঁকা অবনীর মাঝখানে !
কালো কেশতলে ললাট-নিটোলে আঁকিনু যে ভুরু দুটি,
চেয়ে তার পানে উদ্ধত জনে চরণে পড়িল লুটি' !
অনলে-সলিলে মিলায়ে রচিনু উজল আঁখির তারা,
ওষ্ঠে বহিল বিষ-নিশ্বাস, অধরে পীযুষ-ধারা !
আমার মানসী মানবীর রূপে, বকুলের ছায়াতলে,
দাঁড়াইল পুন, মুখখানি আর ঢাকিল না কোন ছলে !
আজ মমে হয়, একি পরিচয় ! আঁকিনু এ কার ছবি !—
সকলে যে মুখ এত বাখানিল, তারে ত দেখেনি কবি !

হায় কবি, হায় ! এমনি করিয়া জীবনের যত ফাঁকি
কল্পনা-রঙ্গে রঙীন করিয়া ঢুলায়েছ দুই আঁখি ।
আধখানি দেখে' বাকি আধখানি ভরিয়া গানের সুরে,
যাহার প্রতিমা গড়িতেছ তুমি, সে যে থেকে যায় দূরে !
লাজ ভেঙ্গে দিয়ে, মুখটি ফিরায়ে, খুলিয়া নয়ন-তারার,
আপন পুতলি হেরিয়া সেথায় হওনি আত্মহার ।

বি স্ম র গী

সারাটি রজনী দীপ জ্বলে রেখে, বাঁধিয়া বাহুর ডোরে,
স্বপন-মগন সে-রূপ তাহার দেখনি নয়ন ভরে' ।
হৃদয় যাহারে দাও নাই, তারে মনের মুকুরে ধরা !
ডুব নাহি দিয়ে, শুধু রূপ-জলে গানের গাগরি ভরা !
ভালো যারা বাসে তারাই চিনেছে, তুমি আঁকিয়াছ তারে—
সে-দিনের সেই তরুণীকে নয়—নিখিলের বনিতারে !
যার তনু ঘেরি' আরতি করিল শরতের আলো-ছায়া—
মানস-বনের মাধবী সে হ'ল ?—ফাগুনের ফুল-কায়া ।

কন্যা-শরৎ

দোপাটি-ফুল—চুটকি পায়ের,
সন্ধ্যামণির নাকছাবি,
গোট পরেছে অপবাজিতার,
কুন্দকলির সাতনরী-হার,
আঁচল-খুঁটে রিংটা-ভরা
কৃষ্ণকলির লাখ চাবি !

শাদা মেঘের গামছা ভাসে
আকাশ-দীঘির ডুব-জলে,
সাঁতার দিয়ে কে ধরে তায় ?—
স্বপন যে ছায় আঁখির পাতায় !
নাইতে নেমে বাড়ছে বেলা,
দুপুর-রোদে রূপ জ্বলে !

বি স্ম র গী

মাটির পরে লুটোয় যে তার
বান্নানসীর সেই চেলি—
আলোয়-কালোয় ওই যে বোনা
কঙ্কাখানির সাঁচ্চা সোনা—
পথের ধুলোয়, বনের ফাঁকে,
হেথায় হোঁথায় দেয় মেলি' !

শিউলিগুলি খোঁপায় প'রে
সাঁজের প্রদীপ নেয় জ্বলে,
ভোর-অঁধারে চুলটি খুলে'
অঁবার সে সব দেয় ফেলে ।
লক্ষ্মীপূজোর পূর্ণিমাতে
আল্পনা দেয় আপন হাতে,
রাত পোহালে জল্কে চলে—
সোনার ঘটে কাঁখ চাপি' !

শিউলির বিয়ে

বিয়ের ফুলটি ফোটার আগেই গায়ে হলুদ যার,
সবাই তারে ফেলবে চিনে’—শিউলি যে নাম তার।
ডালটি কিছু উচুই বটে, কুলীন বাপের মেয়ে—
স্বভাবটি তাঁর রুক্ষ যেমন, গরীব সবার চেয়ে !
বেল-মালতী, জুঁই-চামেলি—এরা সমান ঘর,
কাজেই এদের—যেমনটি চাও, জুটবে তেমন বর।
শিউলি থাকে একটি টেরে গন্ধটুকুন ঢেকে,
শ্বেত-করবী দেখ্ত তারে পাতার আড়াল থেকে।
প্রজাপতি—ঘটক তিনি—করেন যাওয়া-আসা,
বলেন, “বিয়ের বয়স হ’ল, রূপে-গুণে খাসা,
পাল্টি-ঘরের একটি যে বর—পাড়ায় থাকে সে,
বল’ যদি, দিন করি এই মাসের একুশে।
বাপ তো তোমার রাজিই আছে—সেয়ানা তুমি, তাই
গায়ে হলুদ দেওয়ার পরেও মত্টি নেওয়া চাই !”

বি স্ম র গী

শিউলি বলে, “তাই যদি হয়, ঘটক, তুমি যাও,
আমি যে আজ স্বয়ম্বর—পাড়ায় বলে’ দাও ।”
শুনৈ’ সবাই ছি-ছি করে—‘এমন দেখিনি !
কুলীন বলে’ লজ্জা-সরম একটু রাখে নি !’
সঙ্কেবেলায় ফুল-বাবুরা বল্লে মীটিঙ্ করে’—
শিউলিরা সব হ’লেন তবে আজ থেকে এক-ঘরে’ ।
হয়েছে যার গায়ে-হলুদ—বর যদি না জোটে,
জব্দ হবেন বাপ-বেটিতে, থাকবে না জাত মোটে !
শিউলি বলে, “ভয় কি বাবা ! ভাবনা কিসের শুনি ?
ভোর না হতেই বিদেয় হবে,—না হয় ত’ এখুনি !”

* * *

দখিন-হাওয়া বল্লে তারে, “উড়িয়ে নে যাই চল্—
গোলাপী-রং পরীর দেশে ঢাল্‌বি পরিমল ;
মেঘের থামে মণির মালায় তারার বাতি জ্বলে
গাঁথ্‌বে তোমায় চিকণ হারে, নীলার থালায় ঢেলে !
শুকতারাটি ঘুমায় যখন রাত্রি-জাগার পর,
শিয়রে তার ঝালর হয়ে ঝুল্‌বি মনোহর !
আল্‌গা তোমার বোঁটার বাঁধন খুল্‌ব নাকি, সহি ?”—
শিউলি বলে, “কেমন করে’ আকাশ-কুসুম হই ।”

জ্যোৎস্না এল, জরীর চাদর ধুলোয় লুটিয়ে,
বকুল-চাঁপা-হাসু হানার গন্ধ ছুটিয়ে ;

বি স্ম র গী

শাদা মেঘের টোপর মাথায়, জর্দা চেলীর পাড়ে
চওড়া কালো ফিতের বাহার বনের ছায়ায় বাড়ে !
এসেই মুখে একটি মুঠো মাখিয়ে দিয়ে আলো,
বল্লে, “তোমার নেই পাউডার ?—দেখায় সে কি ভালো ?
রূপের স্বপন দেখবে যদি বন্ধ কর আঁখি,—
তার চেয়ে এই চাদর দিয়ে মুখটি তোমার ঢাকি ।
নিশুত্ রাতের নিরালাতে চাইবে যখন ফের,
রুক্ষ-কঠিন শাখার ব্যথা আর পাবে না টের ।
আকাশ থেকে আসবে নেমে পরী-কুটুঙ্গিনী,
বনে বসেই পারবে হ’তে স্বপন-বিহঙ্গিনী ।”—
একটি কথা কয় না দেখে জ্যোৎস্না গেল ফিরে,
শিউলি ভাবে—‘চাইনে স্বপন ভুলতে ধরণীরে’ ।

আঁধার যখন আবছা হ’ল পূব-আকাশের পানে,
পাখীর ন’বৎ উঠল বেজে ঘুমেরি মাঝখানে,—
শিউলি শুনে শিউরে ওঠে, বৃকের তলায় তার
কিসের যেন স্মৃতি জাগে—গায় কি চমৎকার !
গাইছে—“ওগো ফুলের মেয়ে, জানি তোমার পণ,
—কোন জনারে সকল শোভা করবে সমর্পণ ।
ধূলোর উপর কে পেতেছে বৃকের আসনখানি ?
আগুন-তাপেও কে করেছে সবুজের আমদানি ?
মাড়িয়ে চলে সবাই, তবু মাথায় করে শেষে—
দেব্ তাকে দেয় শীষটি যে তার, পুণ্য আশিস্ যে সে !

বি স্ম র গী

মেঘের মতন, শৃঙ্খল-পথের নয় সে উদাসী,
চপল হাওয়ার ইয়ার সে নয়, গন্ধ-বিলাসী ।
রূপটি যে তার প্রাণের আরাম, দুর্বাদলশ্যাম—
জানি, তোমার বুকের মাঝে লেখা যে তার নাম !”

শিউলি বলে, “থাম্ না তোরা, দুটি পায়ে পড়ি,
এখুনি সব উঠবে জেগে, বলবে—গলায় দড়ি !—
সহিতে আমি পারবো না সে,—তবু, দোয়েল ভাই,
কুলীন হ’য়েও কেমন করে’ এমন ঘরে যাই !
বুঝি প্রাণে—মন টেনেছে ধূলোমাটির পানে,
দখিন-হাওয়া, আকাশ পেলেও থাকব না এইখানে ।
ঝাঁঝিঁর ডাকে শুনেছিলেম করুণ কাঁদন তার—
সারাদিনের অনেক ব্যথার একটি সে বঙ্কর !
তাই ত আমি মনে-মনেই হ’লাম স্বয়ম্বর,
এক নিমিষেই আপন হ’ল—ছিল যে-জন পর !
তবু আমার এমনি কপাল !—দেখতে না পাই তাকে,
জোচ্ছনা আর অন্ধকারে লুকিয়ে সে যে থাকে !...
বল্ না তোরা—ভোর হ’ল কি ? মিহিন্ কুয়াশায়
ছাদনা-তলা দেয় কি ঢেকে ওড়নাখানির প্রায় ?
সেই লগনে তোরা সবাই তুলিস্ কলস্বর,—
ততক্ষণ এই চোখের শিশির ঝরুক তাহার ’পর ।”

*

*

*

সকালবেলায় ঘুমটি ভেঙে সবাই দেখে আসি—
সবুজ ঘাসের বুকের উপর শিউলি-ফুলের হাসি !

বাদল-রাতের গান

বাঁশী বাজে বাদল-রাতে
বৃষ্টিধারার সাথে-সাথে,
বাঁশী বাজে, বৃষ্টি পড়ে—
গাছের পাতায়, ঘরের ছাতে ।
গভীর রাতে নিদ্রাহারা—
মনের ঘরে বেড়ায় কারা ?
চমকে ওঠে বাতির আলো,
দেয়ালে সব কালো-কালো
ছায়া নাচে—হাতটি হাতে,
বাদল-বাঁশীর সাথে-সাথে !
আলো কাঁপে, ছায়া নড়ে—
দেখছি শুয়ে বিছানাতে ।

বাঁশী বাজে ব্যাকুল স্বাসে,
বৃষ্টি-ধারায়, বিজন বাসে ।
হারা-দিনের স্বপনগুলি
চোখের পাতা দেয় যে খুলি' !

বি স্ম র নী

যা' ছিল, যা' হবে না আর—
সেই গানেরি সুরের বাহার
বাজায় বাঁশী বাদল-রাতে,
বৃষ্টিধারার সাথে-সাথে !

বৃষ্টি পড়ে ঘরের ছাতে—
জ্যোৎস্না নামে আঁখির পাতে !
বাদল-মেঘের ফাঁকে ফাঁকে
চাঁদ উঠে যে !—কোকিল ডাকে !
বাদল-ধারায় বাঁশী বাজে
দুপুর-রাতে প্রাণের মাঝে !

একটি সে পথ ছায়ায়-ঢাকা,
আঁধার-আলোর মায়ায় মাখা—
সেই সে পথে এক তরুণী '
(এখনো তার কাঁকণ শুনি !)
ভরতে আসে কলসটিরে
হাসির গাঙে, সুরের নীরে !
হঠাৎ গেল পথ হারিয়ে—
কার ঘরে সে উঠল গিয়ে !
আজ্কে যে তা'র সে-মুখখানি,
অধর-ভরা মৌন-বাণী,

বি স্ম র গী
নিজ্জাহারা আঁখির পাতে
স্বপন দেখায় বাদল-রাতে !

বাদল-মেঘের অশ্রুজলে
দেখছি যে তার কুন্ত ভরা !
উছলে ওঠে কক্ষতলে—
আঁকড়ে তবু বক্ষে-ধরা !
দাঁড়িয়ে ঝুঁকে শিথান 'পরে,
বৃষ্টিধারার গান সে করে !
কালো চোখে পলক যে নাই,
কালো কেশের দিশা না পাই !
কেবল অধর তেমনি আছে—
তেমনি রাঙা, বুকের আঁচে !
সেই সাহসে মনের ভুলে
দিতে গেলাম মুখটি তুলে—
জানলা ঠেলে দম্কা-হাওয়া
ধম্কে বলে, “আবার চাওয়া !
সিঁদূর ও যে সিঁথির সীমায়—
পরের ঠোঁটে চুমু কি খায় !”

বাঁশী বাজে বাদল-রাতে,
বৃষ্টিধারার একটানাতে,

বি স্ম র গী

‘হ’ত যা’—তা’ আর হবে না’—
গাইছে তারি সাথে-সাথে !
আবার স্বপন ঘনিয়ে আসে
বাঁশী বাজে ব্যাকুল শ্বাসে,
গাছের মাথায় বাতাস মাতে,
গভীর ছপূর বাদল-রাতে ।
আলো কাঁপে, ছায়া নড়ে—
দেখছি শুয়ে বিছানাতে ।
বাঁশী বাজে, রুষ্টি পড়ে
গাছের পাতায়, ঘরের ছাতে ।

বাঁধন

পাশে শুয়ে শিশু করিছে আকুল
কলভাষে,
প্রিয়া বাঁধিয়াছে বাহুপাশে ।
দীপ মিটি-মিটি, শেষ হয় রাত,
শিশু আর পাখী আনিছে প্রভাত,
বড় হাত মোর কণ্ঠে জড়ায়,
ছোট হাতখানি
বুকে আসে—
পাশে শুয়ে শিশু করিছে আকুল
কলভাষে ।

আজি নিশা-শেষে একি স্তম্ভুর
জাগরণ !
একি আঁখি-সুখ আহরণ !
কচি অধরের হাসির কাকলি
কোন্ স্তখে প্রাণ তুলিছে আকুলি' !

বি স্ম র গী

রমণীর মুখে নূতন মহিমা—

নিমেষে টুটিল

আবরণ !

আজি নিশা-শেষে একি সুমধুর

জাগরণ !

ঘুম-ভাঙা আঁখি হেরিছে স্বপন

অনিমেষে—

স্বরগ-সুধার রসাবেশে !

প্রিয়া চেয়ে আছে শিশুর বয়ানে—

শিথিল বেগীটি লুটায় শিথানে,

ঝল্‌মল্ করে হারখানি তার

পয়োধর-মূলে

সরে' এসে !—

মোর আঁখি আজ হেরিছে স্বপন

অনিমেষে ।

বধু ও জননী পিপাসা মিটায়

দ্বিধাহারা—

রাধা ও ম্যাডোনা একাকারা !

অধরে মদিরা, নয়নে নবনী,

একি অপরূপ রূপের লাবনি !

বি স্ম র গী

সুন্দর ! তব একি ভোগবতী

মরম-পরশী

রসধারা !

বধু ও জননী পিপাসা মিটায়

দিধাহারা ।

পাশে শুয়ে শিশু করিছে আকুল

কলভাষে,

প্রিয়া বাঁধিয়াছে বাহুপাশে ।

জনমে-জনমে ওই বাহুপাশ,

শিশু-কণ্ঠের ওই কলভাষ,

বাঁধিয়াছে জানি গাঁটছড়াখানি

দ্বিগুণ করিয়া

দৃঢ়-ফাঁসে—

তাই ধরা পড়ি এই ধরণীর

বাহুপাশে ।

পাথক

জানি শুধু—যাব বহুদূর,
আসিমাছি বহুদূর হ'তে !
জানিনা কোথায় কবে
পথ-চলা শেষ হবে—
লুকাইবে লোক-লোকাস্তর
অন্তহীন অন্ধকার-শ্রোতে ।

যত চলি তত ফিরে ফিরে
চেয়ে দেখি দূর বনরেখা—
ফেলিয়া এসেছি যারে
রাতি-শেষ আঁধিয়ারে,
স্মরি' তায় ঝরে আঁধিনীর,
আবার যে-একা—সেই একা !

পড়ে' আছে নব উষাপানে
দূর দেশ, কোথা নাই কেহ !

বি স্ম র গী

তারি মাঝে তরু-ছায়া
রচিবে নূতন মায়া,
পুন কোন্ অচেনার গানে
ভুলে যাব কালিকার স্নেহ ।

শুধু চলা !—পিছনে সমুখে
পথখানি আদি-অন্তহীন !
সমুখেরে করি পিছে—
কাল ছিল, আজ মিছে !
মেতে উঠি ক্ষণিকের স্নেহে—
ভালোবাসি, তবু উদাসীন !

তবু এই জনম-জাঙাল
চাহি না যে শেষ করিবারে !
জানিতে চাহিনা কবে
দেহ-যাত্রা শেষ হবে—
মুছে যাবে লোক-লোকান্তর
অন্তহীন অন্ধকার-প্রোতে ।

মৃত-প্রিয়া

কাল রাতে সে স্বপ্নে আবার দাঁড়িয়েছিল এসে,
তেমনি করে'—তেমনি মলিন হেসে !
মুখখানি তার ছোট-বেলার মত—
নতুন-বিয়ের বধূর মতন নত,
শিশির-ধোয়া ফলটি যেমন—অশ্রুজলে মাজা'
গাল দু'খানি তেমনি নিটোল তাজা !
দাঁড়াল সে জান্নাটিতে এসে,
স্বভাব-সরল বালা-বধূর বেশে ।

দুই হাতে তার মুখটি তুলে' ধরে',
দিলাম শুধু দৃষ্টি-চুমায় ভরে' ।
চোখের কোনায় ঘুমের কাজল টানা—
ঘরের ভিতর আস্তে যেন মানা !
ইচ্ছাটি তার—বাঁধি বাহুর ডোরে,
আমি কেবল মুখটি দিলাম দৃষ্টি-চুমায় ভরে' ।

বি স্ম র গী

যাবার বেলায় শেষ-বিদায়ের রূপটি সে ত নয়!—
সে যে আরো অনেক বয়স—অধিক পরিচয়!
এ যেন সেই আদর-চাওয়া নিত্য-অভিমানী—
প্রথম-প্রেমের ফুল-ফাগুনের সোহাগ-সুখের রাণী!
এ যেন সেই কিশোর-কালের বৃন্দাবনের সাথী,
—ভরা-দুপুর ছিল যখন পূর্ণিমার রাতি!
ছিল যখন বুকের মাগিক বাহুর হারে গাঁথা,
গাল ছুঁখানি ধরলে হাতে, বুজ্জু চোখের পাতা!
মুখখানিতে আঁচল দিয়ে ফুঁপিয়ে-ওঠা একটু অনাদরে—
ফুটত হাসি তেমনি আবার একটি চুমার পরে!
এ যেন সেই দীঘির জলে সকালবেলার ফুল,
বোঁটায় যেন ভার সহে না—পাপড়িতে আকুল!

চাঁদ ছিল না, বোধ হয় যেন শুধুই তারা জ্বলে—
স্বপন-সাঁজের আলো-ছায়ার তলে
চেয়ে মুখের পানে—
মনে হ'ল, সেই বা কোথায়, আমিই বা কোন্‌খানে!
এত কাছে, এত আপন!— প্রাণের পরিচয়!
তবু যেন আমার সে নয়, নয়!
তারে যেন হারিয়ে গেছি, আর পাব না ফিরে—
সে যেন কোন পরদেশিনী—আর এক সাগর-তীরে,
কোন্‌ সে মহা রহস্য-মন্দিরে

বি স্ম র ণী

বাস করে সে একাকিনী—বলতে আছে মানা,
আমার সে যে নিতান্ত অজানা !

কইলে শুধু একটি কথা—কণ্ঠ যেমন মধুর,
তেমনি করুণ বুক-ফাটা স্মর অভিমানী বধূর !—
আদর করে’ হাত দু’খানি হাতের মুঠায় ভরে’
জিজ্ঞাসিলাম, “হাঁগো, তুমি এলে কেমন করে’ ?”—
চোখ নামিয়ে মাটির পানে চেয়ে,
বল্লে যেন কতই ব্যথা পেয়ে—
“এসেছি যা’ করে’ !”

—কান্নাতে তার কণ্ঠ এল ভরে’ ।
আমি যেন কতই নিষ্ঠুর, কতই উদাসীন—
একটিবারও দেখতে তারে চাইনি এতদিন,
তারই যেন একার জ্বালা—তারি যেন মরণ !
টান্তে গোলাম বুকের কাছে—হয় না যে আর স্মরণ !

হঠাৎ গেল ঘুমটি ভেঙে, রাত্রি তখন অনেক—
বাইরে এসে আকাশ পানে রইলু চেয়ে ক্ষণেক ;
মনে হ’ল, এই ছিল সে দাঁড়িয়ে আমার পাশে,
এখনও তার কথার আভাস কাণে আমার আসে ।
কৃষ্ণ রাতি—মাথার উপর মস্ত শামিয়ানা—
সোনার-কুচি-ছিটিয়ে-বোনা কালো কাপড়খানা !

বি স্ম র গী

তারি তলায় বিজন অন্ধকারে,
দুটি কথা চুপি চুপি বলিই যদি তারে—
শুন্তে দেবে নাকি ?
মৃত্যুপুরীর গ্রহরীদের ঢুলুতেছে না আঁখি,
এমন গভীর নীরব নিশুত্-রাতে ?
আকাশের ঐ একটি কোণা একটু তুলে' হাতে,
চায় যদি সে একটি পলক,
সরিয়ে দিয়ে আঁধার-অলক,
সেবারের সেই ছান্‌লা-তলায় শুভ-দৃষ্টির মত !—
বাগীট তার বাজবে নাকি গহন-রাতির বীণায় অনাহত ?
হ'লই বা সে অনেক দূরের
একটুখানি বাঁশির সুরের—
বর্ণা-ঝরার—শব্দ যেন স্তূর-পরহত !
তারায়-তারায় পৌছে দেবে চোখের চিঠিখানি—
অকূল হতে আকূল-করা কাতর দিঠিখানি !

ওগো, তোমার পথ খুঁজে আর আস্তে হবে নাক',
যেথায় থাকো, ঘুমিয়ে তুমি থাকো !
স্মরণ শিখায় প্রাণের প্রদীপ জ্বলে,
বহর পরে বহর ঠেলে ঠেলে,
পৌঁছব যে তোমার ঘরে আমি—
সেদিনের সেই চার-চোখেতে প্রথম-চাওয়ার স্বামী ।

বি স্ম র গী

জানি, তুমি আর ভুলেছ সবি—
দেহ-মনের সকল কালের ছবি,
অভিনয়ের সজ্জা যত—সব ফেলেছ খুলে,
বাঁধা-বেণী এলিয়ে এলোচুলে,
মৃত্যু-সিনান শেষে এখন পরলে নিয়ে টানি’—
প্রেমের যেটি আসল বয়স তারি বসনখানি !
নও গৃহিণী, নও ঘরগী—সেইটি যে গো সকল ভুলের ভুল !
সংসার ত’ তারেই বলে—নিত্য-ঝরা পল্কা বোঁটার ফুল !
একটু আছে গন্ধ-মধু, তাতেই করে অমর—
পরশ-মণির পরশ সে যে—বধু-বরের অধর !

সেই ভরসার তরীখানি আঁধার অভিসারে,
এপার হ’তে বাইব আমি তোমারি ঐ পারে ।
তোমায় আবার আন্তে যাব চতুর্দোলায় চড়ি’
ফুল-শয্যা যাবে আবার চাঁদের আলোয় ভরি’ ।
ঘোমটা-খোলা মুখখানি সে দেখেও বারম্বার,
মনে হবে নতুন-দেখা, চির-চমৎকার !
যে-কথাটি বলতে বাধে—লজ্জা করে কত—
বলতে তবু কতই না সাধ—সেইটি অবিরত
লজ্জা-রাঙা মুখটি তোমার দুইটি হাতে তুলে’
জিজ্ঞাসিব অধীর হয়ে, ভালোবাসার ভুলে ।
সত্যিকারের সেই ক’টা দিন—চিরদিনের অতীত—
তারাই রবে সাথে-সাথে—মরণ-মোহন অতিথ !

বি স্ম র ণী

জগৎটারে রাখব আমি ছয়ার হ'তে দূরে—

অজর হব স্মরণ-সুধায় পাত্রখানি পূরে' !

নির্ভাবনায় ঘুমাও তুমি, আমার স্বপন পাঠিয়ে দেব তোমায়,
আমায় তুমি হারাওনি ত !—সিঁদূর নিয়ে গেছ সিঁথির সৌম্য ।

মৃত্যু-শোক

এই মর্ত্যের মূর্তি-মেখলা
যে-রূপে বাঁধিল যারে,—
সেই অপরূপ রূপখানি যবে
মিশে যায় নিরাকারে,
সারা ধরণীর বায়ু-মণ্ডল
প্রেমিকের চোখে করে ছল্‌ছল,
দিবসের ছায়া আলোকাঞ্চল
অশ্রু মুছাতে নারে,
একটি সে রূপ না হেরি' নয়নে
বুক ভরে হাহাকারে ।

যেমন সে হোক— তাই হৃন্দর,
কেহ নহে তার মত !
জগতে কোথাও নাই সমতুল—
তাই কাঁদি অবিরত ।
বহুর মাঝারে সেই একজন,
এক সে দেহের একটি গঠন—

বি স্ম র গী

তার যাহা-কিছু তাহারি মতন,
—একবার হ'লে গত,
এ ছায়া-আলোকে আর গড়িবে না
কায়াখানি তার মত !

হায় দেহ !—নাই তুমি ছাড়া কেহ—
জানি তাহা প্রাণে-প্রাণে,
মুরতি-পাগল মনের মমতা
তাই ধায় তোমাপানে ।
তোমারি সীমায় চেনার শেষ,
তুমি আছ তাই আছে কাল-দৈশ,
দুঃখ-সুখের মহা পরিবেশ !—
দেহলীলা-অবসানে
যা থাকে তাহার বৃথা ভাগাভাগি
দর্শনে-বিজ্ঞানে !

তোমারেই চিনি, হে দেহ-দেবতা !—
প্রলয়ের একাকার
তুমিই রুধিছ বহুবিধ রূপে
তোমারে নমস্কার !
দেহে-দেহে তুমি, এত অভিনব ।
দেহের বাহিরে কোথা বাস তব ?

বি স্ম র গী
হাসি-ক্ৰন্দন—তব উৎসব !
পিরীতির পারাবার !
অধরে, উরসে, চরণ-সরোজে
আরতি যে অনিবার !

যাহারে হারাই তার মত নাই—
এই শুধু মনে জাগে,
তাই আমরণ স্মৃতি-মন্দিরে
নাম জপি অমুরাগে ।
দেহ নাই আর, তবু দেহ দিয়া
প্রেতলোকে তারে রেখেছি বাঁধিয়া,
রূপ অরূপের দুয়ারে কাঁদিয়া
তারি দরশন মাগে—
কায়া নাই, তবু ছায়াখানি তার
রাখি নয়নের আগে !

দেহ নশ্বর, নহে তাঁর মত—
ভুবনেশ্বর যিনি,
তাঁরে পাওয়া যায়, যোগী-সাধকেরা
সাধনায় লয় জিনি' ।
আর তুমি, প্রেম !—দেহের কাঙ্গাল !
হারাইলে আর পাবে না নাগাল,

বি স্ম র ণী

শতযুগ এই জনম-জাজ্বাল
ঘুরিলেও কোন দিনই
পড়িবে না চোখে সেই রূপ-রেখা—
স্বপনের সঙ্গিনী !

যারে পাওয়া যায় কোটি ববষেও—
কি তার মূল্য আছে ?
তাই মহেশের অচল বক্ষে
মহামায়া ঐ নাচে !
গলে দোলে, হেব, মুণ্ডের মালা,
লোল রসনায় পিপাসাব জ্বালা,
পিঠের তিমিরে মৃত-দিব্বালা
দশদিক্ ব্যাপিয়াছে !—
মথিয়া চিত্ত, মহা অনিত্য
নিত্যের বুকে নাচে !

যার সাথে দেখা শুধু একবার,
অসীমের সীমানায়,
জন্ম-নদীর জল বুদ্ধুদ
মৃত্যুর মোহানায় !—
চল-তরঙ্গ তটের কনাবে
আছাড়ি' পড়িয়া গড়িছে যাহারে,

বি স্ম র গী

তার সে ভঙ্গি ধরিতে কে পারে
শ্রোতোমুখে পুনরায় ?
তাই জীব যে গো শিবেরও অধিক
দুর্লভ-কামনায় !

অসীম আধারে সে যে বিদ্যুৎ !

—অদ্ভুত পরকাশ !

মাগরে-গগনে ক্ষণ-আহ্বান—

সৃষ্টির উল্লাস !

তাহারি বিহনে বিদারি' শ্মশান
কাঁদে সতী-হারা শিবের বিষণ,
তারি নথকণা তীর্থ-নিশান

—অমৃতের আশ্বাস !

পীঠে পীঠে তারি পাদপীঠ' ধরে
পাষণের পরিহাস !

তাই মনে হয়—দিবসে নিশীথে,

তন্দ্রায় জাগরণে,

হারা-মুখ যবে ধেয়াই একেলা

বেদনার তপোবনে—

যেন চলিয়াছি তরগী বাহিয়া

অস্ত-রঙ্গীন আকাশে চাহিয়া—

বি স্ম র গী

যেন সে গোধূলি-আলোকে নাহিয়া,
সৈকত-অঙ্গনে,
মিলিতেছে আসি' নব নব বেশে
নরনারী জনে-জনে ।

তটভূমি 'পরে রয়েছে দাঁড়ায়ে
মুবতি সে অগণন,
যেন মায়াময় ছায়া-পুতুল—
জুড়াল না ছ'নয়ন ।
বুঝিনু তখনি, সে কোন্ পিপাসা —
কার অকারণ দরশন-আশা
জাঁখিতে পরায় অশ্রু কুয়াসা,
—কুণ্ঠায় ভরে মন,
এ শিলন-মেলা বিরহেরি খেলা,
বৃথা এই আয়োজন !

একটি মূবতি খুঁজে খুঁজে ফিরি
জনতার মাঝখানে—
নব-মহিমায় নেহারি তাহাবে,
স্বপনের সন্ধানে !

বি স্ম র নী

পলক ফেলিতে সে ছায়া মিলায়,
আপন শূন্য সবারে বিলায় !—
উৎসব-শোভা লান হ'য়ে যায়
আলোকের অবসানে,
মরণের ফুল বড় হ'য়ে ফোটে
জীবনের উচ্চানে ।

ঘুমুর ডাক

তুপুর-রাতের জ্যোৎস্না যেন—তুপুর-নিঝুম রৌদ্রখানি
অলস-শিথিল বাহুর ডোরে
ছায়ার গলা জড়িয়ে ধরে,
এলিয়ে দিয়ে আলোক-তনু স্বপন দেখে কার না জানি !
বিজন-বনের বৃকের ব্যাথা,
তরু-লতার মনের কথা,
তপ্ত হাওয়ার হাই লেগে হয় পাতায়-পাতায় কাণাকাণি ।
দূরে—হোথায় নদীর 'পরে
নৌকা চলে পালের ভরে—
থির-নিথরের মধ্যখানে চলনটি তার ঘুমপাড়ানি !

এমন সময় অশথ-শাখে
ওই না হোথায় ঘুমুর ডাকে ?
ক্ষপালি-সুর উঠল বেজে তুপুর-বীণার সোণার তারে !
আব্‌ছা' হ'ল আঁধার যে তায়,
নীল মেড়ে দেয় সবুজ পাতায়,
টুকরা-রোদের আল্পনাটি ফুটিয়ে কে দেয় ছুধের ধারে !

বি স্ম র ণী

বদলে গেল আলো-ছায়া,
দুপুর-দিনেই রাতের মায়ী—
ঝাঁ-ঝাঁ-আকাশ জুড়িয়ে গেল হঠাৎ-ফোটা তারার হারে !

ঘুঘু ডাকে, আবার ডাকে—
ঘুমের বনে, স্বপন শাখে !
এক নিমেষে মিলিয়ে যে যায় সহজ-চোখের শ্যাম-সোণালি !
দাঁড়িয়ে সে কোন্ সাগর-কূলে,
চোখের উপর হাতটি তুলে'
দিগন্তরের ধূসর সীমায় দেখে ছি দিনের শেষ-দাঁপালি !
যে-সুখ আমার নেইক জানা,
যে-দুখ বুকে দেয় নি হানা—
তারই পরশ করায় বুকে আঁধার-আলোর ঐ মিতালি !

রূপ-কথারি রূপের রাণী, পাথর-পুরীর প্রাচীর-তলে,
সাঁজের আলোর আব্‌ছায়াতে বন্দী যুবার বক্ষে চলে !
রাত-প্রভাতের কঠিন মরণ
আপন মাথায় করলে বরণ—
তার চরণের শিকলখানি জড়িয়ে বাঁধে আপন গলে !
বিদায়-বেলার সেই যে হাসি,
নয়ন-ভরা চাউনি-রাশি—
গভীর রাতের চাঁদের মতন, নীল-আকাশের অগাধ জলে !—

বি স্ম র গী

সেই চাহনির কালো-ফিতায়,
সেই হাসিটির জরীর স্তায়,
ভূপুর-দিনের ঘুমের শাড়ীব পাড় বুনে দেয় স্মরে স্মরে—
ঘুঘু ডাকে ওই যে দূরে !

ঘুঘু-ঘুঘু ! ঘুঘু-ঘুঘু !—
তেপান্তরের মাঠের 'পরে মরুর হাওয়া বইছে হুহু !
পেলেম দেখা সেই বিদেশে
ছায়া-পুরীর প্রান্তে এসে—
একটি যে গাছ তারি তলায়—তারি শাখায় ডাক্ছে ঘুঘু !
পেলেম দেখা—চিন্লে না সে !
বাঁধ্তে গেলাম বাহুর পাশে—
পিছিয়ে দাঁড়ায়, মাঝখানে সেই মাঠ যে দেখি কর্ছে ধূ-ধূ !
অস্ত-পারের একটি তারা
তাকায় যেমন পলক হারা—
তেম্নি করে' রইল চেয়ে মুখের পানে সে-জন শুধু !

ঘুঘু—ঘুঘু— ঘু !—
পোড়ো-বাড়ীর আঙিনাতে,
শিউলি-ঝরা শরৎ-প্রাতে,
সোণার জলের ছড়া কে দেয় ?—সেই কথা কি ঘুঘু বলে ?

বি স্ম র গী

ঝুলে-পড়া বারান্দাতে,
ভাঙা-ছাতের আলিসাতে
চাঁদের আলোর হাহা-হাসি—যুঘু শুধায়—কিসের ছলে ?
শ্মশান-পথে যাবার বেলায়
বধূর দু'পায় আলতা বুলায়—
কমন শুভ-সিঁচুর দিয়ে সাজায় তারে এয়োর দলে !

যুঘু—যু—যু!—
যুঘুর ডাকে অলস ছপুব
একটি পায়ের বাজায় নূপুর,
আওয়াজটি তার খিতিয়ে ওঠে গভীর নীরবতার বুকে;
কোন বিধবা রুক্ষ-কেশে
জানলাটিতে দাঁড়ায় এসে,
যুঘুর ডাকে উলুধ্বনি শুন্ছে সে কি স্বপন-স্থখে ?
স্মরটি বিমায় বুকের তলে—
রোদ্র যেমন দীঘির জলে,
কান্না-চাপা' গানের মত ক্ষণেক ভোলায় সকল দুখে !
চির-রোগীর পাণ্ডু ঠোঁটে
পান-খাওয়া লাল-রংটি ফোটে,
অন্নহীনের প্রেমের চুমা উপোস-করা প্রিয়ার মুখে !

বি স্ম র ণী

ঘুঘু ডাকে ?—আর ডাকে না !
স্মৃতি যে তাব যায় না চেনা,
রৌদ্র-পাথর নিথর হ'ল, বনের ছায়া ঘনিয়ে আসে ।
ঘুঘুর ডাকের স্মৃতির তুলি
জঁকছিলো যে স্বপনগুলি—
মেঘের শাদা ননীৰ মত মিলায় তারা নীল আকাশে !
ঘুঘু ডাকে কেমন স্মৃতি ?—
ডাকে সে যে অনেক দূরে !
মনের মাঝে হারিয়ে যে যাই—সে স্মৃতি এখন কোথায় ভাসে !

সত্যেন্দ্র-বিয়োগে

‘শরৎ-আলোর সোণার হরিণ’ ছুটল না ত’ গগন-পারে !
কে ভুলালো তোমায় কবি, অমানিশার অন্ধকারে ?
পারের পরিজ্ঞাতের স্বপন ছাইল নয়ন-দুইখানিতে—
সারা ভুবন পেরিয়ে গেলে কোন্ অচেনার হাতছানিতে ?
হঠাৎ বুঝি পড়ল চোখে মেঘের কোলে মরাল-সারি—
মানস-সরোবরের পথে চললে উড়ে’ সঙ্গে তারি ?

হায় কবি হায়, ফুলের ফসল ফুরায় নি যে ! দিন ফুরালো !
শিউলি-বকুল সবগুলি ওই হাত দু’খানি কই কুড়ালো ?
মনের বনের যে-সব কুঁড়ি ফুটল না আর গানের বোঁটায়—
দূর-বাগানের হাসু হানার গন্ধ হ’য়ে হাওয়ায় লোটায় !
আঁধার-রাতের হাসু হানা !—হাস্বে না আর জ্যোৎস্নারাতে !
মরণ-সাপের গরল-নিশাস জড়ায় যেন কেয়ার পাতে !

বঙ্গবাণীর প্রাণের ছলল !—বুক-জুড়ানো কোলের ছেলে !
মায়ের আঁচল-বাঁধা প্রসাদ সবটুকু যে তুমিই পেল !

বি স্ম র গী

ঘুমপাড়ানি-গানের ছড়া শিখ্লে তুমি ঘুম না গিয়ে—
বাংলা-বুলির বুলবুলি গো !—হাজার সুরে সুর মিলিয়ে !
মায়ের মাথার সিঁথির পাটি, মায়ের হাতের পৈঁছা-খাড়ু
অবাক হ'য়ে দেখ্লে চেয়ে, ভরলে হাতে মিঠাই-নাড়ু !

তাপস তুমি ! তপের বলে আনলে সকল বিষ় নাশি,
হৃন্দ-ভাগীরথীর ধারা—উঠ্লে জীয়ে ভস্মরাশি !
মৌন-মৃত যাদের বাণী সংস্কৃতির পাতালপুরে—
জয়-জয়ন্তী গাইল তারা নতুন করে' তোমার সুরে !
শব্দ-সাগর যেথায় ছিল—মিলিয়ে দিলে সেই মোহানায়
স্মৃতি সাথে পাগ্লা-ঝোরা, সন্ধ্যু সাথে শোণ-যমুনায় !

আনলে ভরে' ভাষার ঘটে সকল জাতির তীর্থ-সলিল,
ভুবন-জোরা ভাবের হাটে পৌঁছে দিলে দাবীর দলিল !
তোমার মুখে বেণুর আওয়াজ সোণার বীণায় হার মানালো,
'কুহ-কেকা'র ফুল-ফাগুয়ায় চমকে' ওঠে বিজ্জী-আলো !
'অব্র-আবীর'-অঞ্জলিতে রঞ্জিলে যে চরণ তুমি—
শোভায় তাহার ধন্য হ'ল 'গঙ্গাহৃদি বঙ্গভূমি' !

পুরাতনের বিপুল পুরী—ভিতর-আঁধার দেব-দেউলে,
মণিকোঠার দুয়ার ঠেলে ধরলে স্মরণ-দীপটি তুলে !
যুগান্তরের যবনিকায় লুকায় যে সব যুগ-সারথি—
তোমার কবি-চিত্রশালায় নিত্য তাদের ধূপ-আরতি !

বি স্ম র নী

কোন সে-কালের রাজবধূরা চুলগুলি দেয় 'ধূপের ধোঁয়ায়'—
তাদের বসন-ভূষণ-ছটায় উচ্চশিরও কুবের নোয়ায় !

বাদল-দিনের দুই-পহরে আকাশ-ঘেরা মেঘের তলে,
শুনছি তোমার কাজ্‌রী-গাথা—মন-আঁধারে মাণিক জ্বলে !
কান্না-সুরে প্রাণের বেদন মধুর করে' তুলছে কারা ?
কাজল-নয়ন সজল তাদের, কণ্ঠে সুরের সুর-ফোয়ারা !
বাদল-বায়ে ছলিয়ে দোলা, লুটিয়ে বেণী পিঠের 'পরে,
তোমার-দে'য়া গানের ধূয়া বছর-বছর এমনি ধরে !

গোড়-সারং বাজ্‌বে না আর ?—গান-গাওয়া কি থামল তবে !
শুক্রা-তিথির গান-দশমী অর্ধরাতেই আঁধার হবে !
সেই কথা কি জানতে তুমি ?—গ্রহর-শেষের মরণ-ছায়া
ঘনিয়ে আসে, দেখলে চেয়ে ?—তাই সে এমন করুণ মায়া
ফুটিয়ে দিলে চাঁদের মুখে, সবার-সেরা গরবা-গানে—
প্রাণের নিশুত্‌ নিদ্‌-রাগিণী গাইলে চেয়ে তাহার পানে !

ছাতিম-গাছের তলায় তলায়, পঞ্চমুখী জবার বনে,
পাপড়ি কে আর গুণ্‌বে কবি, মন্দ-মধুর গুঞ্জরণে ?
টিয়ার-পালক-সবুজ ক্ষেতে উড়্‌বে যখন শালিক-ফিঙা,
ভাদর-ভরা গাঙের কূলে ভিড়্‌বে মকরাঙ্গী ডিঙা—
মা যে তোমার নামটি ধরে' যুগে-যুগেই ফির্‌বে ডেকে,
গানের মাঝেই মিল্‌বে সাড়া ভাগীরথীর দু'পার থেকে ।

নব তীর্থঙ্কর

[বীব-যুবক যতীন্দ্রনাথ স্মর ও চন্দ্রকান্ত দেবেব
অপূর্ণ আত্মোৎসর্গ উপলক্ষে]

মরণ দিতেছে হানা অনুদিন দুয়ারে দুয়ারে,
আমরা নয়ন মুদি' ভয়ে তারে দিই না যে সাড়া,
জীর্ণ কন্যা দিয়ে ঢাকি কম্পমান প্রাণ-পক্ষীটারে—
পঞ্জর-পঞ্জর টুটি' কখন বা হয় দেহ-ছাড়া !
জানি, এই পুঁতি-পঙ্ক অন্ধকূপ হ'তে বাহিরিয়া
দাঁড়াতে শক্তি নাই তরীহীন তমসার পারে—
যেথায় মিলিছে আসি', দলে-দলে মর-দেবতারা,
উষার উষ্ণীষ মাথে, লোকালোক-গিরিরে ঘিরিয়া !

প্রাণ নাই, ভাণ আছে—জন্ম-মৃত্যু ছ'ই বিড়ম্বনা.
মরণ যে হত্যা শুধু, বেঁচে-থাকা বিধাতার গ্লানি !
শান্ত আছে—শিথিয়াছি ভালোমতে করিতে বঞ্চনা
মানুষের মনুষ্যত্ব, স্বার্থত্যাগে অতি-সাবধানী ।
দিবসে তারকা খুঁজি দীপ্ত রবিরশ্মি পরিহরি',
ধর্ম জানে পুরোহিত !—মোরা জানি তাঁহানি অর্চনা !

বি স্ম র ণী

ভুলেছি ওঙ্কার-নাদ, আত্মার সে আদি-ব্রহ্মবাণী,
মুক্তা নাই, শুক্তি আছে—মুক্তি নয়, মন্ত্র জপ করি !

শ্বেত-সুপর্ণ ! হে গরুড় ! কোথা হ'তে সুখা সঞ্জীবনী
হরিয়া করিলে পান মৃত্যুবিষ-মথন পাথারে ?
আমরা শুনেছি শুধু আঘাতের আশু বজ্রধ্বনি,
আহুতির হোমশিখা হেরি নাই নিকষ-অঁধারে !
কোন শাস্ত্র শিখাইল অবহেলে আত্ম-বলিদান ?
মোক্ সেকি ? স্বর্গ-লোভ ?—বলে' দাও ওগো বীরমণি !
ধর্মধ্বজা নর-পশু হঠে' যাক্ কাতারে-কাতারে,
পুঁথি আর পৈতা-পূজা চিরতরে হোক্ অবসান ।

মৃত্যু ও নচিকেতা

ঔদালকি-আরুণির পুত্র বালক নচিকেতা পিতৃসত্য-রক্ষার
জন্তু যমপুরে গমন করেন। সে সময়ে যম গৃহে না থাকায়
তাঁহাকে তিন রাত্রি অনশনে থাকিতে হয়। অতঃপর, যম
গৃহে ফিরিয়া তাঁহার যথোচিত সম্বর্দ্ধনা করেন, এবং অতিথি-
সৎকারে বিলম্ব হওয়ায় নচিকেতাকে ঈপ্সিত বর প্রার্থনা
করিতে বলেন।

মৃত্যু ও নচিকেতা

নচিকেতা

বৈবস্বত ! অতিথির করিবে তর্পণ
বরদানে ? অন্না বর দিও না আমায়—
আমি চাই নিরখিতে চির-অগোচর
তোমার স্বরূপ-রূপ, অমৃত-বান্ধব !
আবরণ কব উন্মোচন, জ্যোতিষ্মান !
অন্ধ অঁখি জ্বলিতেছে দৃষ্টি-পিপাসায় !
বাণী তব কর্ণে পশে প্রতিধ্বনিসম,
বৈতরণী-জলশ্রোতে নাহি কলরব—
বায়ু যেন নহে শব্দবহ !—নাহি হেথা
ছায়াতপ, নেত্রে মোর কুহেলি ছলিছে !
বিশাল তোমার পুরী, দিবানিশাহীন—
তারি মাঝে ধূমনীল স্থির স্থাণুসম
কত কাল দাঁড়াইবে, হে মৃত্যু-দেবতা !

[নেপথ্যে পিতৃগণের গান]

হেথা স্নান করি মোরা অমৃত সাগর জলে—
মর্ত্য-নদীর মুক্তির মোহানায়,

বি স্ম র গী

হেথা পান করি সুধা তারকা-তরুর তলে,
কৃষ্ণা-তিথির জ্যোৎস্নার সীমানায় ।
এবে তরিয়াছি মোরা অশ্রুজলের লবণ-অম্লধি,
এ যে নয়নে ঝরিছে সোম-দেবতার স্বপন-কৌমুদী !—
বিস্মরণের বীণাখানি বাজে
মোহন মূর্ছনায় ।

হেথা ঋতু, হোরা, পল, নৃত্য-চপল-নহে,
ধির-জাঁখি 'পরে ছলিছে না আলো-ছায়া ।
হেথা দিবা-নিশা দৌহে মধুরে মিলিয়া রহে—
বিথারি' বদনে গোধূলির স্নান মায়া ।
এবে দিক্-দিগন্ত উদয়-বিলয় হয়েছে অস্ত রে !
এ যে স্মৃতিহীন মরণানন্দে চেতনা সস্তরে !
বিস্মরণের বীণাখানি বাজে
মোহন মূর্ছনায় ।

মৃত্যু

হে বালক ! বৃথা নয় তব অনুযোগ—
তবু সৌম্য ! আমি মৃত্যু, তুমি মর্ত্য-জন ।
এখনো নয়ন দুটি মমতা-মেদুর,
আরক্ত অধরে যেন কাঁপিছে কাকুতি ।

বি স্মরণী

পৃথিবীর পাণিস্পর্শে সুন্দর ললাট
সুস্মরণ, নাসিকায় এখনো স্থিতিছে
মর্ত্য-শ্বাস ! রূপরসগন্ধভারাতুর
প্রাণের বিচিত্র ছন্দ ধ্বনিছে গভীর
স্বললিত কলভাষে ! পিতার আদেশে
আসিয়াছ যমপুরে, কেন এ কামনা ?
তপন-আতপ্ত ফুলতনু সুকুমার
উপবাসে পথশ্রমে হয়েছে কাতর—
লহ পাণ্ড-অর্ঘ্য এই, ক্ষম অপরাধ
অতিথির বিলম্ব-সংকারে । সুস্থ হও ;
চাহিও না, নচিকেতা, মৃত্যু-পরিচয় !
যাহা কিছু বরণীয়, শ্রেষ্ঠ, ভূমণ্ডলে,
তাই দিব, সেই বব লভ, প্রিয়তম !

নচিকেতা

ওগো মৃত্যু ! কহিয়াছি কামনা আমার—
হেরিব স্বরূপ তব ! স্নিগ্ধ কি নির্মম,
করুণ কোমল, কিবা ভীষণ ভয়াল
হেরিতে বাসনা চিতে !—সহস্র জনম
জন্মিয়া মরেছি আমি, তবু মনে নাই
কেমন তোমার মুখ ! আজ প্রাণে মোর
জাগিয়াছে সেই আশা, দেখিব তোমায় !
তোমাতে চিনি না, তবু দিবা-বিভাবরী

বি স্ম র নী

হেরিয়াছি ওই ছায়া রবি-শশি-করে—
হরিৎ, শ্যামল, পীত, লোহিতের মাঝে
উড়ে তব উত্তরীয়, পদচিহ্ন তব
গণিয়াছি কতবার জীবযাত্রাপথে !
বৈবস্বত ! করিও না অবিশ্বাস মোরে,
প্রাণে জাগে নিরন্তর তোমার মূরতি !—
পূরাও কামনা মোর—খোল' আবরণ !

মৃত্যু

কি দেখিবে নচিকেতা ?—মৃত্যুর স্বরূপ ?
মৃত্যু মহা-ভয়ঙ্কর, জানে সর্বজীব ;
জীবনের সুখশয্যাতে লুপ্ত-স্বপন
মরণ-কল্পনা !—সেই মৃত্যু দাঁড়াইয়া
তোমার সম্মুখে, আবরিয়া সর্বদেহ
কহিতেছে স্মৃতি-বচন, তাই তব
হৃদয়-নির্ভয়, সাহস অপরিসীম !—
জগতের লঘুলীলা ভুলায়েছে তোমা,
হে গৌতম, নহি আমি জীবনের মিতা !
আমারে দেখিতে চাও ?—প্রদোষ-অঁধারে
দারুণ ঝটিকাবর্তে ছিন্ন কণপ্রভা
হেরিয়াছ—দাঁড়াইয়া তরণীর 'পরে
তরঙ্গ-দোলায় ? মহারণে পথহারা,
সহসা সম্মুখে তব হেরিয়াছ কভু—

বি স্ম র গী

ধাবমান অগ্নিকেতু বনস্পতি-শিরে ?
অর্দ্ধরাত্রি, নিদ্রোথিত ঘোর কলরবে,
করিয়াছ অনুভব—হুলিছে মেদিনী ?
সেও তুচ্ছ ! তারো চেয়ে কত ভয়ঙ্কর
মৃত্যুর আসন্ন মূর্তি কালান্ত-তিমিরে !
বালক কিশোর তুমি, নবীন বয়স—
ধবগীর স্তম্ভরসে স্তিমিত চেতনা,
কি বুঝিবে মরণের রীতি সুকঠোর ?
কহ মোরে, এ কামনা কেমনে পশিল
চিন্তে তব, কীট যথা প্রস্ফুট প্রসূনে !

নচিকেতা

শুনিয়াছি, মর-জ্যেষ্ঠ পিতৃলোকে তুমি—
পশেছিলে মৃত্যুপুরে তুমিই প্রথম,
তাই দেনগণ, বসাইয়া সিংহাসনে,
প্রেতরাজ্যে তোমাতেই দিল অধিকার ।
হে রাজন ! কহ মোরে—সে কি বিভীষিকা—
সৃষ্টির প্রথম মৃত্যু !—তুমি দেখেছিলে !
নহ মর-জ্যেষ্ঠ শুধু, জ্ঞানিশ্রেষ্ঠ বটে—
তোমাতে প্রণমে আজ অমৃত-সমাজ,
আত্মার আত্মীয় তুমি, হে সূর্য্যতনয় !
মৃত্যু যদি মহাভয়, দ্যলোক-দুয়ারে
কেন আছ দাঁড়াইয়া ? কেন রাখিয়াছ

বি স্ম র গী

সুধাভাণ্ড করতলে ?—বৃথা ভয় তুমি
দেখাও বালকে !

বয়সে নবীন বটে,
তবু, মৃত্যু ! জেমো আমি জনম-স্ববির !
আমারে করেছে বুদ্ধ তোমারি ভাবনা ।
জাতিস্মর নহি—তবু আবালা আমার
নয়নে জ্বলিছে কোন্ দিব্য দীপশিখা !
সে আলোকে জীবনের চারু চিত্রপট
বিবর্ণ মলিন ! সে আলোকে নিশিদিন
হেরিয়াছি কার যেন স্নগস্তীর ছায়া !
প্রত্যক্ষ জাগ্রৎ যাহা—সে যেন স্বপন,
নদীজলে প্রতিবিস্ব সম ! সত্য কহি,
হাসিও না ! ঔদ্ধালকি-আরুণি-তনয়
মিথ্যা নাহি জানে ।

মৃত্যু

অদ্ভুত কাহিনী বটে !
সতেজ সরস বসন্ত এ শীর্ণ কুসুম
কেমনে ফুটিল ? পিতার ভবনে
হের নাই সোম-যাগ ? বেদমন্ত্রধ্বনি,
উদগাতার উদাত্ত সে উচ্চ সামরব,
অগ্নিস্ততি, ইন্দ্রস্তব, বৃত্তজয়গাথা
দিল না হৃদয়ে বল ?—সোমরস-পানে

বি স্ম র ণী

দেবতা-দোসর হয় কীণজীবী নর !
এ সব জানো না বুঝি ? করিও না শোক—
লহ দীক্ষা, শিক্ষা কর অগ্নিহোত্র-বিধি
আমার সকাশে ! কেমনে করিতে হয়
সে অগ্নি-চয়ন—নিৰ্ম্মাণ করিবে চিতি,
কোন মন্ত্রে হবিঃশেষ করিবে গ্রহণ—
শিখাইব সমুদয় ; হে সত্য পিপাসু,
আমি সেই সত্য-মন্ত্র দানিব তোমায়
এইক্ষণে—না চাহিতে দিলু এই বর ।
আরবার কহ, বৎস, কি তব প্রার্থনা ?

নচিকেতা

‘ওগো মৃত্যু সুদক্ষিণ ! দাক্ষিণ্য তোমার
হৃদয়ে রহিল গাথা ; অগ্নিহোত্র-বিধি
যা’ কহিলো বুঝিয়াছি, রতিব স্মরণে ।
সে যে মোর নিত্যকৰ্ম্ম—জন্মিয়াছি আমি
মহাঋষি-কূলে ! জানি, সে সাবিত্রী-মন্ত্র
বলহীনে করে বলদান—তবু দেব !
শুধু মন্ত্রে, স্তোত্রগীতে, হবিঃশেষ-পানে
ভরে না আমার চিত্ত ; অগ্নি বৈশ্বানর
জ্বলিছেন অহরহ অন্তর-আলয়ে !
আমি চাই উত্তরিতে জন্ম-জলধির
নিস্তরঙ্গ বেলাভূমে—আলোক-ঔপাধ,

বি স্ম র গী

উদয়াস্ত অতিক্রমি', পছঁ ছিতে সেই
জ্যোতির্ময় দেশে—যেথা নাই দুঃস্বপন,
যেথা দেবগণ নিয়ত অমৃত-পানে
জ্যোতিষ্মান, যথাকাম করে বিচরণ !
ব্রহ্মবাক্য-পূত হ'য়ে যেথা সোমরস,
বিনা যাগযজ্ঞবিধি, বিনা আহরণ
করিছে নিয়ত ! বৈবস্বত ! সেই লোকে
শাস্ত অমৃত-পদ দিবে না আমায় ?
দেখাও স্বরূপ তব ! জানি, যেই জন
হেরিয়াছে ওই রূপ, ছিঁড়ি' মোহপাশ
যায় সে যে ঋবলোকে—যথা বৎসতরী
ছিঁড়িয়া বন্ধন-রজ্জু ধায় নিরুদ্দেশে !

জানি না কেমন তুমি, তবু মনে হয়
তুমি মনোহর ! বাহিরিয়া গোচারণে,
প্রথম-প্রারুটে যবে নবমেঘোদয়
হেরিয়াছি নদীপারে, চন্দ্রভাগা-তীরে—
চাহি' তার অভিরাম সুনীল বয়ানে
অকারণ অশ্রুবেগে হয়েছি কাতর,
মুহূর্ত্তে জাগর-স্বপ্নে হারায়েছি জ্ঞান !
কোথায় সে পদে পৃথ্বী, রুদ্ধ ক্ষেত্রতল,
গবীদেব হান্সারব নাহি পশে কানে,
মাধ্যন্দিন সবনের কথা ভুলে গেলু !

বি স্ম র গী

হেরি' সেই উজ্জ্বল নবঘনশ্যাম
ভুলে গেলু কেবা আমি, কোথায় বসতি,
কি নাম আমার ! জন্ম-মৃত্যু-ইতিহাস
নিমেষে পাইল লয় ! যেন সৃষ্টি-প্রাতে
ফিরে গেলু—বাজিল এ বন্ধে মোর
আত্মীয়ের আদিম বিরহ !—মেঘ নয় !
যেন ওই আকাশের বিমল দর্পণে
দোলে নীল স্মৃতিখানি !—সুধাই তোমায়,
সে কি তব প্রতিচ্ছায়া ? তোমারি আভাস ?

মৃত্যু

নচিকেতা ! মৃত্যু নীল নহে, নাহি-তার
বর্ণ-রূপ ! জানো না কি, করে সে হরণ
নেত্র হ'তে সর্বরশোভা ?—সে যে অন্ধকার !

নচিকেতা

তাই বটে ! দিবা, নিশা—দুই ভগিনীর
একজন স্বর্ণসূত্রে করিছে বয়ন
ধরার বরণ-বাস আলোক-দুকূলে !
অপরা সে, অন্তাচল-শিখর-শায়িনী,
জ্যেগে থাকে নির্ণিমেষ—নিত্য খুলে দেয়
অসংখ্য সে তারকার সূচীমুখ দিয়ে
দিবসের সুদীর্ঘ সীবন !—অন্ধকার !

বি স্ন র গী

সান্দ্র স্তব্ধ স্নগস্তোর স্নিগ্ধ অন্ধকার !—
বুঝিয়াছি, তারি তলে তোমার আসন ।

মনে পড়ে, একবার আমি, রিষ্টিশেন—
দৌঁহে মিলে গিয়েছিলাম পর্বত-ভ্রমণে ;
শালবনে সূর্য্য অস্ত যায়—বহুক্ষণ
দাঁড়াইলাম দুইজনে অরণ্য-সীমায়,
মালভূমি 'পরে । দূর পশ্চিমেব পানে
উঠিয়াছে অভ্রভেদী চতুঃশৈলচূড়।
তুষার-ধবল—যেন স্তম্ভ-চতুষ্টয়
ধরে' আছে আকাশের নীল চন্দ্রাতপ !
তারি তলে আলুপ্তিতা মুমূর্ষু উষাব
হেরিলাম মৃত্যুশয্যা ! পূর্বাচল হ'তে
ছুটিয়া এসেছে সে যে সারাটি আকাশ
সবিতার আগে আগে—দেয় নাই ধরা !
এতক্ষণে, প্রণয়ীর প্রগাঢ় চুম্বনে
খুলে গেল কালো কেশ, রক্ত চেলাম্বর !
আব সে কুমারী নহে, নহে সে অহনা,
কন্যা জ্যোতির্ময়ী !—বধূবেশী সন্ধ্যা সে যে
মৃত্যু-স্বয়ম্বর ! তখনি সে অন্ধকারে
মুছে গেল রক্তস্রোত, তবুও মানসে
বহুক্ষণ নেহারিলাম শোণিত-উৎসব !

বি স্ম র গী

মনে হ'ল, পশ্চিমের যজ্ঞ-বেদিকায়
দেবতার। করে যাগ—দীর্ঘ অগ্নিষ্টোম,
ঊষা তায় নিত্যবলি, সবিতা-ঋত্বিক্
হোম করে আপনার পরাণ-বধুরে !
এ রহস্ত বুঝি না যে ! তবু কহ শুনি,
সম্ব্যা-রক্তরাগ, পশুর শোণিত-পঙ্ক—
সে কি, মৃত্যু ! তোমারি ও আঁধার ললাটে
লোহিত তিলক ?

মৃত্যু

জানো দেখি এত কথা,
তবু কৌতূহল ? হে বালক ! বুঝিলাম
বিজ্ঞ তুমি, রহদর্শী, সহজ-প্রবীণ !
তবুও চপল চিত্ত সংশয়-আকুল ?

নচিকেতা

তাই বটে—মূঢ় আমি ! তাই প্রাণে-মনে
এখনো বিরোধ । প্রাণ বলে, নহে নহে—
এক নহে মৃত্যু আর মরণ-দেবতা ।
মৃত্যু—সে যে স্থনিশ্চিত দেহ-পরিণাম,
তাহারি শাসনতরে দগুধর তুমি,
মৃত্যু হয় কালে কালে, তুমি মহাকাল !
মনে তবু জাগে সদা সভয় ভাবনা,

বি স্ম র গী

করে তারে মর্ত্যস্থে ঘোর উদাসীন ;
তাই তার সর্বদুঃখ, দুরাশার আশা,
সফল করিতে চায় মৃত্যু-পরপারে—
তুমিও কোরো না সেই বৈরাগ্য-সাধনা ।
তরুণ তাপস তুমি, ভোগ-আয়তন
ফুল্লতনু যৌবন-উন্মুখ !—দুই চক্ষু
নীলোৎপল—ঢল-ঢল, পীযুষ-পিয়াসী !
উদার তোমার মন, প্রসন্ন ইন্দ্রিয়—
ভুঞ্জিবে সকল স্থখ তুমি মহীতলে ।
মহাভূমি, হস্তী, অশ্ব, হিরণ্য প্রচুর
দিব তোমা—পরমায়ু সহস্র-শরৎ,
দেহে কাস্তি, বক্ষে বীৰ্য্য, বল বাহুযুগে ;
দিব নারী অগণন—মোহিনী অপ্সরা,
রথারূঢ়া বাদিত্রবাদিনী ! কর ভোগ
সমুদয়, রতি আর প্রমোদ-কৌতুকে !
অমৃত ?—সে ব্যাধিতের বিকার-জল্লনা !
দেহের বিনাশ হয় কাল পূর্ণ হ'লে,
তার পর আবার জনম ; শস্ত্রসম
জন্মিয়া পাকিয়া বারে, জন্মে পুনরায়
পৃথ্বী'পরে মর্ত্যজন, বর্ষস্তুতক্রমে !
আমি শুধু করি উৎপাটন প্রাণ তার
মুঞ্জা হ'তে ঈষিকার মত । নচিকেতা !
দেহীর সহজ ধর্ম্ম জানে সর্বজন,

বি স্ম র ণী

নাহি পশ্চাৎ অশ্রুতর, জন্মান্তে আবার
জন্মিতে হইবে ধ্রুব !— কর পরিহার
বিফল বাসনা । জীবনের শ্রেষ্ঠ বর
করিতেছি অঙ্গীকার— বিত্ত আর আয়ু,
তার চেয়ে বড় কিবা, দেখ বিচারিয়া !

নচিকেতা

বিত্তে নহে তপণীয় চিত্ত পুরুষের !—
ওগো মৃত্যু ! জীবনের ঐশ্বর্য্য-আড়ালে
তুমি কেন চিরদিন আছ দাঁড়াইয়া ?
ধরার অমরাবতী, রুধি' বাতায়ন,
চিতা-ধূম নিবারিতে পারে ?—উৎসবের
আনন্দ-বাঁশরী, মিলনের মঞ্জুগাথা
কেন বা গুমরি' ধরে বিদায়ের সুর ?
ধরিয়াছ নানা ভোগ সম্মুখে আমার—
আছে সুখ, তৃপ্তি কোথা ? এই মোর দেহ
জরিবে না গুপ্তচর জরা সে তোমার ?
অস্তক তোমার নাম—তুমি কহিয়াছ,
প্রাণীদের প্রাণ-ধন কর উৎপাটন,
শস্য হ'তে ঈষিকার প্রায় !—কহ তবে,
কতকাল ভুঞ্জিব সে ভোগ সুদুর্লভ ?
সহস্র-শরৎ আয়ু ? তার বেশি নয় ?

বি স্ম র নী

যম বুঝি বাঁধা আছে নিয়ম-শৃঙ্খলে ?—
তাই তুমি নিয়তির কঠিন নিগড়
ঢাকিতেছ ফুলদল দিয়া ?—ধিক্ মৃত্যু !
ধিক্ প্রতারণা !—দেহ-অন্তে এক পথ !
নাহি পস্থা অতীত ?—শুনে হাসি পায় !
বৈবস্বত ! নচিকেতা জানে তোমা চেয়ে !
জানিয়াছি সেই সত্য—নহে বলদিন,
শুনি নাই, হেরিয়াছি স্বচক্ষে আমার,
এখনো রোমাঞ্চ হয় সে কথা স্মরিলে !
শুন মৃত্যু ! সে কাহিনী কহিব তোমায ।

পিতামহ বাজশ্রু বা বানপ্রস্থ শেষে
প্রায়োপবেশন করি' ত্যজিলেন তনু
বিপাশার তীরে । কৃষ্ণা-বাদশীর তিথি,
রজনী তৃতীয় যাম, দক্ষিণাগ্নি-শিখা
শুভশংসী—পরশিল স্তূপকাষ্ঠ-মূলে,
জ্বলিয়া উঠিল চিতা । নদী পূর্ববমুখী—
মিশিয়াছে একেবারে দিক্-চক্রবালে ।
দাঁড়ায়ে অনতিদূরে আমি চেয়েছিছ
অন্যমনে, অন্ধকার আকাশের পটে ।
হোথায় সে মহাকায় কৃষ্ণ-তুরঙ্গমে
পিতৃলোকে পিতৃগণ দেন সাজাইয়া
তারার মুকুতা-হারে ! সহসা হেরিগু

বি স্ম র নী

ভূমিতলে—চিতা হ'তে হতেছে উদয়
স্ববহু শশিকলা, তরণীর প্রায়,
পূর্ব্বাকাশে ! সেই ক্ষণে বিস্ময়-বিস্ময়
হেরিলাম সে কি দৃশ্য স্বপ্ন-অগোচর—
দেহ-অস্ত্রে পুণ্যবান বৃদ্ধ বাজশ্রুবা
আরোহি' আলোক-যানে যান দেবলোকে !
ক্ষণ পরে চিতা ছাড়ি' কিছু উর্দ্ধে উঠি'
শোভিল সে চন্দ্রকলা সূদূর আকাশে
নদীসীমা-শেষে,—দিব্যচক্ষে হেরিলাম
আত্মার অমৃত-পস্থা মৃত্যু-পরিণামে !
ওগো মৃত্যু ! পারিবে না ভুলাতে আমায়—
এ বিশ্বাস ত্যজিবে না মূৰ্থ নচিকেতা !

মৃত্যু

হে ব্রাহ্মণ, ত্যজিও না বিশ্বাস তোমার—
নহ মূৰ্থ ! তোমা চেয়ে জ্ঞান-গরীয়ান
আছে নাকি আর কেহ সপ্তসিন্ধু-দেশে !
বালক ! তোমার চিন্তে সত্য উদিয়াছে
অকলুষা পূর্ণশ্রদ্ধা ব্রহ্ম-জিজ্ঞাসার !
তুমি ভাগ্যবান, প্রসন্ন তোমার 'পরে
আত্মা প্রেমময় ! তাই ললাটে তোমার
জ্বলিয়া উঠেছে হেন শুভ্র জ্যোতিষ্কটী !
প্রবচন, বহুশ্রুত, স্মমহতী মেধা—

বি স্ম র নী

কিছুই পারে না তাঁরে লাভ করিবারে ;
আপনি যাহারে তিনি করেন বরণ,
সেই লভে !—ওদালকি-আরুণি-তনয় !
লহ বর, যাহা ইচ্ছা, জীপ্সিত তোমার ।

নচিকেতা

এইবার নয়নের মিটাও পিপাসা—
আবরণ কর উন্মোচন, জ্যোতিষ্মান !

মৃত্যু

কোথা আবরণ, নচিকেতা ?—নেত্র হ'তে
আপনি খসিয়া যাবে সূক্ষ্ম মায়াজাল ;
মৃত্যুর রহস্য-কথা শুনিতে শুনিতে
শ্রবণ-উৎসুক চিত্ত হবে নির্বিবকার,
মুহূর্ত্তে সংশয় মুক্ত নেহারিবে তুমি
আমার স্বরূপ-রূপ অন্তরে বাহিরে !

শুন নচিকেতা !—হৃদয় দুর্ব্বল যার,
মলিন, সঙ্কীর্ণমনা, স্বভাব-কুপণ—
সেই নর যুগবদ্ধ পশুর সমান
মৃত্যুর আঘাত সহে জীবযজ্ঞভূমে ।
ভয় তারে ক্ষুদ্র করে, মর্ত্য-মরু মাঝে
ভ্রমায় হারায় দিশা মৃগ-ভৃষিকায় !

বি স্ম র গী

বারবার পড়ি' মৃত্যুমুখে, হয় তার
নিত্য অধোগতি ; দুই বন্ধ করতলে
ধরিয়া রাখিতে চায় সর্বস্ব আপন,
তাই মূঢ় অতি-লোভে হারায় সকলি !
মৃত্যু তার মহাভয় !—আমারে হেবিলে,
সঙ্কুচিয়া সর্ববদেহ, শশকের মত
রহে চক্ষু বুজি'—ভাবে বুঝি হেন মতে
এড়াইবে হিংস্র ক্রুর ব্যাধের সন্ধান !
সে জন চাহে না এই রূপ নেহাবিতে—
তোমা সম, নচিকেতা ! নয়ন বিস্ফাবি' ।

নচিকেতা

এখনো হেরিনি তোমা—তবু মনে হয়,
সরিছে কুহেলিজাল, ধূম্রনীল দেহ
ঈষৎ ছলিছে !—রজনীব শেষ যামে,
বাঁধিছে উষার রথে শুক্লা পয়স্বিনী
অশ্বিনীকুমার বুঝি ? আর কিছুক্ষণে
উদবে আঁখিতে মোব হিরণ্ময়ী বিভা
দিগন্ত প্রাবিনী ।

মৃত্যু

এইবার কহি শুন

আমার স্বরূপ—হে ব্রাহ্মণ ! কহি তোমা
সেই বাণী, নিহিত যা' গহন গুহায় !

বি স্ম র গী

কহিয়াছি কিছু আগে অগ্নিহোত্র-বিধি—
সেই অগ্নি জ্বলিছেন দিব্যজ্ঞানরূপী
তোমারি অন্তরে !—ওই দেহ চিতি তার,
প্রাণ হবিঃ, আমি তার সূচির-আছতি !
বলবান, আত্মাবান, প্রজ্ঞাবান যেই—
আপনারে আপনি সে দেয় বলিদান
জগতের যজ্ঞ-যুগে, মহোৎসবে মাতি' !
বিশ্বপ্রাণে বিলাইয়া নিজ প্রাণধন
ভুলে' যায় হর্ব-শোক—চির-উপরতি
লভে বীর, সুমহান্ আত্মার আলয়ে ।—
আমি যজ্ঞ, আমি সেই অপরূপ হোম !
যেই অগ্নি সেই সোম !—কহি আরবার,
ওই দেহ সোমের কলস ! যজমান
করে সোমযাগ—করে পান আপনি সে
আপনারে, আনন্দই হবিঃশেষ তার !
সে আনন্দ—সেই মৃত্যু—অমৃত-সোপান !
এই যজ্ঞ করেছিলা আমি, নচিকেতা,
তারি ফলে লভিয়াছি ধ্রুব অধিকার
যমলোকে ; এই যজ্ঞ করে যেই জন
মৃত্যুজয়ী হয় সেই নিঃশেষে মরিয়া !—
করি' স্নান যজ্ঞশেষে, সর্ববস্ত্রানিছারা,
আশ্বিনের অভ্রসম, শুভ্র স্তনিস্থল,
মিশে' যায় মহানভোনীলে !

বি স্ম র গী

নচিকেতা

ওগো মৃত্যু !

কোথা আমি ? তুমি কোথা ?—নয়নে আমার
নাহি আর কায়া-ছায়া ! দৃষ্টি সৃষ্টিহারী
ডুবে' যায় বর্ণহীন আলোক-পাথারে !
কর্ণে জাগে স্তব্ধতার মহার্মোন-বাণী !
দেহ হ'ল স্পন্দহীন !—রোমাঞ্চ, পুলক,
স্বৈদ, কম্প, শিহরণ—কিছু নাই আর !
বীতরাগ, বীতশোক, বীতমন্যু আমি !
ভয় নাই, নাই আশা !—এই কণ্ঠে মোর
ধ্বনিবে না কভু আর স্তুতি, আরাধনা,
যাচনা, মিনতি !—এই মৃত্যু !—ধন্য আমি !—
বৈবস্বত ! এতক্ষণে তোমার প্রসাদে
মরিলাম চিরতরে আমি নচিকেতা ।

মৃত্যু

ধন্য তুমি !—শ্রুতিমাত্রে নিমেষে ঘুচিল
দেহ-পাশ !—সিদ্ধি যেন ভাবনা-রূপিণী !
কালের সায়েরে বুঝি তুমি ফুটেছিলে
অমৃত-পরাগ-ভরা মর্ত্য-শতদল !—
আপন আবেগে তাই আপনি ঝরিলে !
মানিলে না যমের শাসন, পিতৃলোক
তব যোগ্য নহে !—আলো ভালো লাগিল না,

বি স্ম র গী

জীবনের অন্ধকার-দুয়ার খুলিয়া
এলে তাই মৃত্যুপুরে, স্বপ্নাতুর-আঁখি,
সত্যের সন্ধানে ! স্বপ্নশেষে এইবার
স্বষ্টি-সাগর,—উদবে তাহারি কূলে
সেই জ্যোতির্লোক—চন্দ্রতারকার ভাতি
স্নান যেথা, দ্যুতিহারা বিদ্যুৎ-বল্লরী !
অগ্নি যেথা চিত্রবৎ—নিপ্রভ, মলিন !
হে ব্রাহ্মণ ! হেরিলাম তোমার মাঝারে,
দেহজয়ী, কালজয়ী, মৃত্যুজয়ী সেই
পুরাণ-পুরুষে !—যাঁর মহা-মহিমায়
উর্দ্ধ হ'তে মহানিন্দে পশিছে আলোক,
নিম্ন হ'তে উর্দ্ধে উঠে আহুতির ধূম—
স্বর্গে-মর্ত্যে রহিয়াছে নিত্য-পরিচয় ।
অমৃতের পুত্র তুমি, হে মর্ত্য-বান্ধব !
মৃত্যুপুরী তীর্থ আজ তোমার পরশে,
তোমারি প্রসাদে আমি চির-জ্যোতিষ্মান !

বিস্মরণী

আমারে তোমবা ভুলে' যেয়ো ভাই !

এসেছিনু পথ ভুলে'—

পান করিবারে জাহুবী-বারি

কীর্তিনাশার কূলে !

বহু জনমের বার্থ পিপাসা

এবার পূরিবে, মনে ছিল আশা,

ভাস্মা-মন্দিরে বেঁধেছিনু বাসা

পুরাণো বটের মূলে ;

প্লাবনের মুখে ভেসে গেল সব

কীর্তিনাশার কূলে !

* * *

নিশীথ-শিয়রে সপ্তমী চাঁদ—

তখন কৃষ্ণা-তিথি,

কুহেলি-আকাশে কাঁদে দিক্‌বালা

হারায়ে তারার সিঁথী !

বি স্ম র গী

সেই কালে আমি বাহিরিনু পথে,
নদী-গিরি পার হ'নু কোন মতে,
উতরিনু শেষে স্বপনের রথে
বন-যুধিকার বোধি ;
পূর্ণিমা চাঁদ ছিল না আকাশে—
তখন রাম্ভা-তিথি ।

তারার আখরে কে লিখিছে লিপি
ধরার ললাট-পটে !—
ভেবেছি নু আমি পড়িব তাহারে
দ্বিধাহীন অকপটে ।
যে কাহিনী কহে নিশীথ-গগন,
যার অভিনয়ে দিবস মগন,
ধরিবারে চাই সে লিপি-লিখন
বসুধার বালুতটে—
তারার আখরে যে-লিপি বিহরে
নভোনৌলিমার পটে !

মরণ আমারে দু'হাতে বাঁধিল
মুখ-চুম্বন লাগি'—
হিম হ'য়ে গেল বুকের পাঁজর
শিশির-শয়নে জাগি' ।
হেরিনু, জীবন আধেক স্বপন—

বি স্ম র ণী

তারকার চোখে তাকায় তপন !
যে-আধা আধারে রয়েছে গোপন
হ'নু তার অনুরাগী,—
বুকের আগুন জুড়াইয়া গেল
হিমেল হাওয়ায় জাগি' ।

তোমাদের তরে রয়েছে সমুখে
ধরার অরুণোদয়,
আমি তিমিরের তীর্থ-পথিক,
তারকার গাহি জয় !
যে আলো কাঁদিছে উর্দ্ধ ভুবনে—
তরল তুহিনে কাঁপিছে পবনে,
তারি এক কণা মনের ভবনে
করিয়াছি সঞ্চয়,
তারি হাসি হেসে রজনীর দেশে
করিনু অরুণোদয় !

ত্রিযামা যামিনী খুঁজে-খুঁজে ফিরি
মণি সে বিস্ময়রণী !
কামনার ফুলে গাঁথিলাম মালা—
বেদনার বন্ধনী ।
যা-কিছু কুড়াই হাটে আর মাঠে
ফেলে' দিয়ে যাই জনহীন বাটে,

বি স্ম র গী

জীবনের এই যৌবন-ঘাটে
তরিনু বৈতরণী !
গাঁথি কামনার শতনরী-হারে
মণি সে বিস্মরণী !

সুপ্তি-সাগরে ফেন-তরঙ্গ
স্ফুরিছে জ্যোতির্ময় !
মনো-মুদগ্ধে ধ্বনি অনাহত
নিবারিছে সংশয় !
কানে জাগে রূপ, সুর বাজে চোখে !—
বেড়াই অতীত অনাগত লোকে,
সমুখে পিছনে—সুদূরের শোকে
ভুলি নিকটের ভয়,
যে সুখ স্বপন তাহারি রভসে
জগৎ জ্যোতির্ময় !

হাসি হাহাকার না জানি সে কার—
প্রাণ করে উতরোল,
সেই কলরবে ভুলি জন-রব,
পথের কলহ-রোল ।
অজানা-জনের আঁখির পাহাবা
স্বজন-সভায় করে দিশাহারা—
তাই ফিরে যায় স্নেহরস-ধারা,
কেঁদে যায় ফুল-দোল !

বি স্ম র ণী

যত হাহাকার হাসির মতন
চিত করে উতরোল !

ভুলিবার ছলে ভরিলাম ডাল।
বাছা-বাছা বনফুলে,
সোঁরভে তার মৃদু ধূপ-বাস,
আত্মাণে আঁখি ঢুলে !
মুকুতা-মুকুলে কার আঁখি কাঁদে !
রাঙা-অশোকের হাসি কারা সাধে !
কেবা নীল নীবি নীপহারে বাঁধে
চম্পক-অঙ্গুলে !—
রঙে সে অতুল মনোবন-ফুল,
আত্মাণে আঁখি ঢুলে !

রূপের আরতি করিনু আঁধারে
আবেশে নয়ন মুদি'—
হেরি, দেহে-মনে বাধা নাই আর,
—উদ্বেল অশ্রুধি !
যে-রেখা আঁকিনু তিমির ফলকে,
যে ছায়া ধরিনু নিমীল-পলকে,
যে-মুখ চুমিনু অলখ-আলোকে,
দিবসের দ্বার রুধি'—

বি স্ম র গী

তাহারি আবেশে উথলিল সুধা-
মস্থন অন্বুধি !

ভুলে গেলু শোক, ভুলিলু ভাবনা—

মমতার পরাজয়,

রাখীটির মত দাঙা হ'য়ে ওঠে

জীবনের ক্ষতি-ক্ষয় !

বাণী বিনাইয়া বাঁধি যে ছন্দ,

তারি মধুমদে পরাণ অন্ধ !

হয় ত' মনের এ মকরন্দ

সত্যের সুধা নয়—

তবু ভুলে আছি তাহারি পুলকে

জীবনের ক্ষতি-ক্ষয় !

হোথা অক্ষুট উষার কিরীটে

শোভিছে হীরক-দুর্ল—

জানি সে আলোক-শিখার সকাশে

দুলিবে না মোর ফুল !

চাঁদের সোনা যে রূপা হয়ে আসে !

তারারা পলায় আগুনের ত্রাসে !

রথ-ঘর্ঘর ওই যে আকাশে

অরুণের—নাহি ভুল !

হোথা সে আলোক-শিখার সকাশে

ফুটিবে না মোর ফুল ।

বিস্মর গী

আমি ধরেছি নু নিশীথের গান
তোমাদের শেষ-রাতে—
জ্যোৎস্না যখন মিলাইয়া যায়
গোধূলি-ধূসর প্রাতে ।
গান শেষ করে' চলে' গেল সবে,
আলোগুলি সব নিব্বৃত্তিছে নভে,
দিবাও আসেনি, নিশা নাই যবে—
বাঁশিখানি ল'য়ে হাতে,
আমি বাহিরিনু বন-পথে একা,
গোধূলি-ধূসর প্রাতে ।

* *

আমারে তোমরা ভুলে যেয়ো, ভাই !
এসেছি পথ ভুলে'—
নয়নে ভরিতে নিশার নিদালি
আতপ-উৎস-কূলে !
যে-গান হেথায় হ'ল নাকো সারা,
সুরখানি তা'র হ'বে না যে হারা,
আরেক ভুবনে সন্ধ্যার তারা
লইবে তাহারে ভুলে'—
নব-জাগরণী গাইবে সেথায়
বিস্মরণীর কূলে !



